

四庫全書

史部

欽定四庫全書

史部

陝西通志卷七十三

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官中書_臣高中

謄錄監生_臣沈玦

欽定四庫全書

陝西通志卷七十三

古蹟第二

府第

園林

郊垌

府第

周

辟廱

在鄠縣東三十里

馬志

鎬京辟廱

詩經大雅

周文王辟

廱在長安西北四十里亦曰璧廱如璧之圓雍之以

水象教化流行也詩云於論鼓鐘於樂辟廱毛萇注

云水旋丘如壁靡以節觀者

三輔黃圖

三代學

周立三代之學學書於有虞氏之學典謨之

教所以興也學舞於夏后氏之學文武中也學禮樂

於商之學功成治定與已同也

禮記注

尹喜故宅

寶鷄有尹喜故宅張三丰邱長春馬丹陽

王重陽劉綱樊夫人秦弄玉仙跡往往而在第虎豹

熊羆時出伺人有獨角獸樵者見其卧林間或搏虎

而食之食輒餘其半山家每得殘虎以飽

偃曝談餘

漢

靈金內府

太上皇微時佩一刀長三尺上有銘字難

識傳云殷高宗伐鬼方所作也上皇遊豐沛山中寓居窮谷有人冶鑄上皇息其旁問曰鑄何器工者笑曰為天子鑄劍慎勿言曰得公佩劍雜而冶之即成神器可定天下昂星精為輔佐木衰火盛此為異兆上皇解匕首投爐中劍成殺三牲以釁祭之工問何時得此上皇曰秦昭襄王時余行陌上一野人授余

云是殷時靈物工即持劍授上皇上皇以賜高祖高祖佩之斬白蛇是也及定天下藏於寶庫守藏者見白氣如雲出戶狀若龍蛇呂后改庫曰靈金藏惠帝

即位以此庫貯禁兵器名曰靈金內府

三輔黃圖

太倉 蕭何立太倉

漢書高帝本紀

在長安城外東南文景節

儉太倉之粟紅腐而不可食

三輔黃圖

武庫 漢書曰武庫以藏禁兵又曰樗里子葬於武庫

文穎曰秦惠王異母弟也師古曰樗里子且死曰葬

我必渭南章臺東後百年當兩天子宮夾我墓漢興

長樂在其東未央在其西武庫正直其上

長安志

辟廱 在長安西北七里漢書河間獻王來朝獻雅樂

武帝對之三雍宮即此禮樂志曰武帝時犍為郡水

濱得古磬十六枚劉向說帝宜興辟廱焉

三輔黃圖

蕭何第 蕭何買田宅必居窮僻處為家不治垣屋曰

今後世賢師吾儉不賢母為勢家所奪

漢書蕭何傳

王莽

為安漢公以故蕭何宅為安漢公第

長安志

石奮宅

石奮高祖召其姊為美人徙其家長安中戚

里

漢書石奮傳

師古曰於上有姻戚者皆居之故名其里

曰戚里

石奮傳注

田子春宅

在漢長安城中孟嘗君孫因諸呂擅權乃

入關圖扶漢誅諸呂故有是宅

馬志

夏侯嬰宅

惠帝及高后德嬰賜嬰北第第一曰近我

以尊異之

漢書夏侯嬰傳

師古曰北第者近北闕之第嬰最

第一也故張衡西京賦云北闕甲第當道直啟

夏侯嬰傳

注

教倉 漢書曰惠帝六年六月起長安西市修教倉

長安

志

代邸 代王至渭橋太尉勃跪上天子璽代王謝曰至

邸而議之閏月己酉入代邸郡臣從至上議請即天

子位代王西向讓者三南向讓者再遂即天子位羣

臣奉天子法駕迎代邸皇帝即日夕入未央宮

漢書文帝

本紀師古曰郡國朝宿之舍在京師者率名邸

文帝本紀注

三輔解 三輔黃圖曰三輔者主爵中尉及左右內史
武帝改曰京兆尹左馮翊右扶風共治長安中是為
三輔郡皆有都尉又曰京兆在故城尚冠里馮翊在
故城內太上皇廟西扶風在夕陽街北此其解治之
所也錄中尉府在尚官冠里街東京兆府即廢中尉
府也長安志

曾孫郡邸 曾孫雖在襁褓猶坐叔郡邸獄而邸吉為
廷尉監治巫蠱於郡邸憐曾孫之無辜使女徒復作

淮陽趙徵卿渭城胡組更乳養後元二年武帝疾往
來長楊五柞宮望氣者言長安獄中有天子氣上遣
使者分條中都官獄繫者輕重皆殺之內謁者令郭
穰夜至郡邸獄吉拒閉使者不得入曾孫賴吉得全

漢書宣
帝本紀

如淳曰謂諸郡邸置獄也師古曰據漢舊儀

郡邸獄治天下郡國上計者屬大鴻臚此蓋平蠱獄

繫收繫者衆故曾孫寄在郡邸獄

宣帝本
紀注

丞相府

平津侯公孫弘自以白衣為丞相乃大開東

閣營客館招延天下士人其外曰欽賢之館以待大
賢之士次曰翹材之館以待大材之士又次曰接士
之館以待國士其有德任毗贊佐理陰陽者處之欽
賢館其有材堪九列將軍二千石者處翹材之館其
有一介之善一方之藝者居接士之館所得俸祿以

奉之

西京
雜記

御史府 漢御史所居曰御史府亦曰御史大夫寺在
大司馬門內無塾其門用梓板不護色亦謂之憲臺

杜氏
通典

御史府中列栢木常有野鳥數千棲宿其上晨

去暮來號曰朝夕鳥

漢書朱
博傳

太學 在長安城南安門之東杜門之西

關中
記

漢太學

中有市有獄

三輔
舊事

司隸府

司隸府治故府即孝武帝廟也

漢舊
儀

保宮

少府官屬有居室武帝更名曰保宮李陵降匈

奴以母繫保宮

長安志 按甘
泉宮別有保宮

鴻臚府

王莽以鴻臚府為安定太后宮

長安
志

長安厨 發長安厨三太牢具

漢書霍光傳

如淳曰黃圖北

出中門有長安厨謂之厨城門

霍光傳注

蠻夷邸

陳湯斬郅支單于上疏乞垂之藁街蠻夷邸

間諸家無言藁街之在何地者唐都高驛即蠻夷邸

在朱雀街西與鴻臚寺近

雍錄

卜肆 司馬季主楚人也卜於長安東市宋忠賈誼同

興而之市游於卜肆中

史記

霍光第 宣帝賜甲第一區

漢書霍光傳

有甲乙次第故曰

甲第音義

王根第 曲陽侯王根大治第室極其奢僭司隸校尉

京兆尹不敢舉奏

馬志

王商第 成都侯商穿長安城引內灋水注第中大陂

以行船上幸商第見穿城引水意恨內銜之

漢書外戚傳

董賢第 哀帝詔將作大匠為賢起大第北闕下重殿

洞門本土之功窮極伎巧柱檻衣以錦綈

漢書董賢傳

細柳倉 在咸陽西三十里漢周亞夫屯軍處

馬志 漢文

帝大將軍周亞夫軍於細柳今呼石徼是也石徼西有細柳倉城東有嘉禾倉樊噲傳柳中即細柳地也在長安西

三輔故事

服虔曰在長安西北如淳曰長安細

柳倉在渭北近石徼張揖曰在昆明池南今有柳市是也師古曰匈奴傳云置三將軍軍長安西細柳渭北棘門霸上此則細柳不在渭北揖說是也

漢書注

物定倉 華州下邽縣南渭河岸上乃漢之物定倉也西京雜記物定倉收貯五穀各先定其性物則不浥

壞故秦漢隋唐於此置倉鄉俗語訛為武底倉

馬志

任安宅

漢任少卿以武功小邑無豪右高賢故居武

功

賈志

陸賈宅

在永壽縣東南好時鎮

永壽縣志

孝惠時呂太后

用事欲王諸呂畏大臣及有口者賈自度不能爭廼

病免以好時田地善往家焉有五男廼出所使越橐

中裝賣千金分其子子二百金令為生產賈常乘安

車駟馬從歌鼓瑟侍者十人詔其子曰與汝約過汝

汝給人馬酒食極飲十日而更

漢書陸賈傳

後漢

如淳宅

漢平帝時賜淳宅於高陵有碑頌節文

賈志

第五倫宅

在三水縣東歸義鄉蒲東杜邠志云東漢

賜田宅三十六所此其一也

三水志

張超廬

在華陰縣霧谷後漢張楷字公超結廬此地

學者如市又能為五里霧故稱張超霧市

賈志

晉

殷濟精廬 水經注云陶渠水東南流逕晉漢陽太守

殷濟廬今不可考

賈志

來賓館 苻健永和十年西虜乞沒渾邪遣子入侍置

來賓館于平朔門以懷遠人

長安志

宋

范栢年宅 在南鄭縣梁州記云范栢年漢中人謁宋

明帝因語廣南貧泉栢年對云臣郡有文川武鄉廉
泉遜水足以為名相傳范栢年宅在廉遜之間即此

賈志

魏

沙苑監 在同州東西八十里南北三十里西魏大統二年宇文泰與高歡戰大破之後於兵立之處建忠武寺令騎士各種柳一株數及七千至今沙苑有柳樹仍以其地宜六畜置沙苑監養養隴右牛羊諸畜以供上方之用故杜甫沙苑行有云左輔白沙如白水繚以周牆百餘里苑中來牝三千匹豐草青青寒

不死集異記云唐明皇十三載重九獵於沙苑雲際
有孤鶴徊翔上親御弧矢一發而中其鶴帶箭墮而
復起及幸蜀遊道觀中視所掛箭道士徐佐卿題乃
上獵沙苑之日也按沙苑在州城南三十里

潛確
類書

隋

煬帝在藩舊宅 武德中賜尚書左僕射蕭瑀所謂少
陵原南接終南北至涇水即漢鴻固原也宣帝許后
葬於此俗號少陵原後瑀子銳尚襄城公主詔別營

主第主辭以姑婦異居有乖禮則因固陳請乃取園地充主第又辭公主榮戟不欲異門乃並施瑀之院

門

長安志

李穆宅 平康坊西北隅隋太師申國公李穆宅其地景龍中為長寧公主府及鞠場景雲中廢並毬場散

賣與居人

長安志

史萬歲宅 長安待賢坊隋北領軍大將軍史萬歲宅其宅初有鬼怪居者輒死萬歲不信因即居之夜見

人衣冠甚偉來就萬歲萬歲問其由曰我漢將軍樊
噲墓近君居廁常苦穢惡幸移他所必當厚報萬歲
許諾因詰殺生人所由曰各自怖而死非我殺也及
掘得骸柩因為改葬後夜又來謝曰君當為將吾必
助君後萬歲為隋將每遇賊便覺鬼兵助已戰必大

捷

兩京記

田弘宅 永寧坊西門之北有隋兵部尚書田弘宅弘
子仁恭德懋及孫元基並以孝義旌時論美之

長安志

按蘇威宅

亦在是坊

廣通倉

在華州隋文帝以長安倉廩尚虛詔以西至

蒲陝東至衛汴水次十三州募丁運米於華州置廣

通倉以給長安

賈志

唐

尚書省

在朱雀門北正街之東自占一坊

雍錄

省中有

都堂本尚書令廳事都堂之東吏部戶部禮部三行

每行四司左司統之都堂之西兵部刑部工部每行

四司右司統之

長安志

尚書省東南隅通衢有小橋相

目為扃項橋言侍御史及殿中久次者至此必扃項

而望南宮也都堂南門道東有古槐垂陰至廣相傳

夜深聞絲竹之音省郎有入相者俗謂之聲音樹祠

部呼為本廳言其清且冷也

因話錄

吏部選院 長安志曰在尚書省之南亦曰吏部南院

選人看榜之所也六典吏部員外郎掌選院謂之南

曹注云其曹在選曹之南故謂之南曹也

雍錄

禮部南院 吏部選院東禮部南院四方貢舉聚會之

所也

長安志

禮部南院者即貢院也今世淡墨書進士

榜首列為四字曰禮部貢院者唐世遺則也則唐人

已嘗名南院為貢院矣有列榜之地如吏部

雍錄

驥德院 後苑有驥德院禁馬所在韋后入飛龍廐為

衛士斬首蓋自玄武門出宮入廐也

雍錄

太平公主宅 興道坊有太平公主宅没官後賜散騎

常侍李令問居

長安志

李光顏宅 開化坊有李光顏宅穆宗初賜第崇德坊

以為別宅

長安志

令狐楚宅 按酉陽雜俎楚宅在開化坊牡丹最盛而

李商隱詩多言晉陽里第未詳

長安志 按長安志韓洄宅馬總宅沈傳師宅

崔垂休宅俱在是坊

劉延景宅 王昕宅 安仁坊有劉延景宅王昕宅延

景即寧王憲之外祖昕即薛王業之舅皆是親王外

家甲第並列京城美之

長安志

元載宅

安仁坊有元載宅

長安志

元載城中南北二甲

第又於近郊起亭榭帷帳什器皆如宿設城南別墅

凡數十所婢僕曳綺羅二百餘人

譚賓錄

載宅有芸輝

堂芸輝香草名也出于閩國

杜陽雜編

按長安志

崔造宅張孝忠宅于頓宅杜佑宅俱在是坊

國子監 在務本坊監東開街若兩坊衛北抵皇城

盡一坊之地監中有孔子廟貞觀四年立

長安志按房元齡

宅張懋昭宅于德

晦宅俱在是坊

蘇勗宅 崇義坊西南隅太子左庶子駙馬都尉蘇勗

宅後為英王園其地湫下無人居

長安志

段秀實宅 崇義坊段秀實宅德宗所賜宣宗大中十

年詔秀實崇義坊宅諸院典在人上計錢三千四百

七十五貫宜賜莊宅錢收贖仍令鴻臚少卿段義楚

追貼舍人計會

長安志

竇易直宅 崇義坊有尚書左僕射竇易直宅

長安志

本

中書令崔圖宅祿山盜國王維鄭虔張通皆處賊庭

洎克復囚於宣陽里楊國忠之舊宅崔圖因召於私第令畫各有數壁當時以圖勲貴無二望其解放運思精巧頗極能事其後皆得寬典其宅鬻於易直太

和中畫尚存

明皇雜錄 按崔元暉宅馬懷素宅韋堅宅王承業宅皆在是坊

楊師道宅

長興坊東北隅駙馬都尉楊師道宅其地

後分裂左監門大將軍韓琦尚書刑部侍郎崔元童

荊州司馬崔光童等居

長安志

杜鴻漸宅

在長興坊鴻漸於長興正深第崇飾門館

賦詩曰常願追禪侶安能挹化源朝士多和之

長安志

張嘉貞宅

在長興坊

馬志

本太常少卿崔日知宅

長安志

馬璘宅

在長興坊

馬志

大曆十四年七月毀元載馬璘

劉忠翼之第天寶中京師堂寢已極宏麗而第宅未甚踰制及安史二逆之後大臣宿將競崇棟宇無復界限而馬璘之堂尤盛璘卒於軍以喪歸京師士庶欲觀之假名故吏投刺會弔者數十百人故令撤毀之自是京師樓榭之踰制者皆毀

德宗實錄

按元行沖宅王丘宅紀

國大長公主宅辛京果宅韋聿宅漢陽大長公主宅
鄭仲宅路隋宅王潘宅史憲中宅鄭顥宅于宗宅俱
在是
坊

禮賓院

元和九年六月置禮賓院於長興里北

冊府元龜

張說宅

在永樂坊本侍中王德正宅燕公大加修葺

馬志

有僧泓與說買永樂東南第一宅戒曰此宅西北

隅最是旺地慎無於此取土越月泓至謂說曰此宅
氣候忽然索漠甚必恐有取土於西北隅者公與泓
偕行至宅西北隅果有取土坑數處皆深丈餘泓大

驚曰禍事令公富貴一身而已更二十年外諸郎君
皆不得天年燕公大駭曰填之可乎泓曰客土無氣
與地脉不相連今欲填之亦猶人有瘡痂縱以他肉
補之終無益也後說子均均皆為祿山委任克復後
均賜死均流之

大唐新語

裴度宅

在永樂坊

馬志

唐實錄云度自興元請朝宰相

李逢吉之徒百計隳沮有張權輿者上疏曰度名應
圖讖宅據岡原不召而來其旨可見蓋嘗有人與度

作讖詞云緋衣小兒坦其腹天上有口被驅逐言度
曾征討淮西平吳元濟也又帝城東西橫亘六岡符
易乾卦之數度永樂里第偶當五岡故權輿以為詞
長安志 按王璿宅王紹宅
李思忠宅蕭寬宅俱在是坊

魏徵宅 在永興坊封演見聞錄曰徵所居室屋卑陋

太宗欲為營造輒謙不受洎寢疾太宗將營小殿遂
輟其材為造正堂開元中此堂猶在家人遺火燒之
子孫哭臨三日朝士皆赴弔唐傳所載亦同至白居

易傳則又曰李師道上私錢六百萬為徵孫贖故第
居易時為拾遺當元和四年建言徵任宰相太宗用
殿材成其正寢後世不能守陛下宜為賢者子孫贖
而還之師道人臣不宜掠美帝從之若如居易所言
則是太宗殿材所造之寢至元和猶在開元中不曾
遭火也特子孫不能保有而貨鬻之耳予詳思其理
開元間所火當是殿材之正寢耳而他屋不皆火也
直以清貧之故子孫盡舉而鬻之居易深探太宗重

徵之意欲其還贖使事出朝廷也至會要所載曰元和四年上嘉魏徵諫諍詔訪其故居質賣已更數姓上出兩庫錢二百萬贖之以還其家禁其質賣據此記與居易傳畧同當是會要又欲歸美憲宗不欲出自臣下建請耳

雍錄 按仇上
良宅亦在是坊

長寧公主宅 崇仁坊西南隅有長寧公主宅主既承恩盛加雕飾朱樓綺閣一時絕勝又有山池別院山谷虧蔽勢若自然中宗及韋庶人數遊於此第留連

彌日賦詩飲宴韋氏敗遂奏為觀詞人名士竟入遊

賞

兩京記

禮會院 崇仁坊之西南有禮會院本長寧公主宅公

主及駙馬楊沆奏割宅向西一半官市為禮會院

每公主郡縣主出降皆就此院成禮

長安志

初開元中

置禮會院於崇仁里自兵興以來廢而不修

德宗實錄按

蘇瓌宅褚无量

宅俱在是坊

李林甫宅 在平康坊本尚書令左僕射衛國公李靖

宅景龍中韋庶人妹夫陸頌所居韋氏敗靖姪孫令問居之後為林甫宅有堂如偃月每欲排擠大臣即處之思所以中傷者若喜而出即其家碎矣

長安志按褚

遂良宅韋澄宅蘭陵公主宅王志愔宅崔泰之宅裴光庭宅張宏靖宅俱在是坊

萬年縣廨 宣陽坊東南隅萬年縣廨去府七里縣門

屋宇文愷所造太平公主降薛紹於縣廨設昏席初以縣門隘狹欲毀之高宗勅宇文愷所造製作多奇

不須毀拆也

長安志

號國夫人宅

在宣陽坊

馬志

貴妃姊號國夫人恩傾一

時於宣陽坊大置第宅棟宇之盛世無與比所居本
韋嗣立舊宅韋氏諸子亭午方偃息於堂廡間忽見
一婦人衣黃羅帔衫降自步輦侍婢數十笑語自若
謂韋氏諸子曰聞此宅欲賃其價幾何韋氏諸子降
階言曰先人舊廬所未忍棄語未畢有工數百人登
東西廂撤其瓦木韋氏諸子既不能制乃率家僮挈
其琴書委於衢路嘆曰不才為勢家所奪古人之戒

將見於今日矣與韋氏隙地十餘畝一無所酬

明皇雜錄

楊鉅與國忠五家於宣陽里甲第洞開僭擬宮掖每

造一堂費逾千萬見制度宏於已者則毀之復造土

木之工不捨晝夜

太真外傳巨源宅劉希進宅楊務廉宅韋叔

按李璣宅竇毅宅韓

夏宅單思遠宅李義宅李深宅鄭惟忠宅郭元振宅楊國忠宅高仙芝宅李靜物宅薛平宅韓公武宅韋

文恪宅張義潮宅俱在是坊

于志寧宅

在親仁坊

馬志

後併入相府閒地置府後勅

賜貴妃豆盧氏後左金吾大將軍程伯獻黃門侍郎

李高等數家居焉

長安志

郭子儀宅 在親仁坊宅居其坊地四分之一通永巷
家人三千出入者不知其居其里巷負販之人上至
簪纓之士出入不問或至王夫人趙氏愛女方粧梳
對鏡公麾下將吏及郎吏皆被召令汲水持帨視之
不異僕隸他日子弟集諫公不應繼之以泣曰大人
功業已成而不自崇重以貴以賤皆遊卧內某等以
為雖伊霍不當如此笑曰爾曹固非所料且吾官馬

食粟者五百匹官餽者一千人進無所往退無所據
向使崇垣扃戶不通內外一怨將起搆以不臣具有
貪功害能之徒成就其事則九族齏粉噬臍莫追今
蕩蕩無間四門洞開雖讒毀無所加也諸子皆服譚
錄

安祿山宅

在親仁坊

長安志

舊宅在道政坊玄宗以其

隘陋更於親仁坊選寬爽之地出內庫錢更造院宇

堂皇辟窳周匝帷帳幔幙充牣其中天寶九載祿山

獻俘至京命入新宅

祿山故事

馮宿宅

在親仁坊

馬志

宿從子衮為給事中宅南有山

林池亭院多養鷺鴨及雜禽之數常遣一家人主之

謂之鳥省

盧氏雜說

按韋琨宅鄭萬鈞宅滕王元嬰宅昌樂公主宅李勉宅歸崇敬宅西華

公主宅李國昌宅俱在是坊

楊憑宅

在永寧坊

馬志

憑入拜京兆尹治第永寧里功

役叢煩謗議頗謹貶臨賀尉

唐書楊憑傳

白樂天得楊憑

宅竹木池館有林泉之致因為池上篇

窮幽記

王仁皎宅 在永寧坊神龍初李晉居焉繕造廊院稱

為甲第勅賜仁皎

長安志

王鏐宅 在永寧坊鏐子稷進永寧里第宣義亭子時

議以鏐因緣累居大鎮營第華侈既沒而入於官固

其所也

長安志

李載義宅 在永寧坊太和五年載義自幽州入朝文

宗賜以居第及米麪錢帛芻籍甚厚

長安志

王鐸宅

在永寧坊

長安志

第中別有書齋退朝獨處其

中欣欣如也

三水小牘

裴行儉宅裴炎宅李輔

白敏中宅張直方宅

李聽宅俱在是坊

李晟宅

在永崇坊

馬志

興元元年賜晟永崇里甲第詔

宰臣諸郎將會送是日特賜女樂八人錦綵銀器等
令教坊太常備樂京兆府供具鼓吹迎導集宴京師

以為榮觀

長安志

按韋抗宅楊鉅宅杜亞宅李賢宅韓宏宅俱在是坊

庾敬休宅

在昭國坊

馬志

敬休宅屋壁有畫奏樂圖王

維常至其處熟視而笑曰此霓裳羽衣曲第三疊第

一折好事者集樂工驗之無一差者

唐國史補

鄭綱相公宅

在昭國坊南門忽有物投瓦礫五六夜

不絕乃移於安仁西門宅避之瓦礫又隨而至經久復歸昭國鄭公皈心釋門禪室方丈及歸將入丈室蟾子滿室懸絲去地一二尺不知其數其夕瓦礫亦

絕翼日拜相

酉陽雜俎

崔瑄宅

柳玘云崔氏居昭國坊宅子孫昌盛衣纓不

絕

長安志按裴子餘宅李寰宅俱在是坊

渾瑊宅

在進昌坊

馬志

興元元年賜兼賜女樂五人錦

綵銀器等宰臣即將會送有司脩饌次於李晟焉

長安

志

按穆敦信宅孫伏伽宅許國師宅陸餘慶宅元載別宅義章公主宅俱在是坊

宋璟宅

在大寧坊

長安志

璟宅中造屋悉東西正陽

譚賓

錄

按寧王憲宅岐王範宅陸象先宅王同暉宅李巖宅俱在是坊

薛繪宅

在勝業坊兄弟子姪數十人同居一曲姻黨

清華冠冕茂盛人謂之薛曲

雍錄

按薛王業宅徐堅宅豆盧建宅席豫宅

朱巨川宅

俱在是坊

張師延宅

在安邑坊

馬志

師延兄弟三人同時三品一

宅之中榮戟齊列時人榮之號三戟張家景龍中司

農卿趙履溫居焉

長安志

李吉甫宅

安邑坊有李吉甫宅

長安志

吉甫宅泓師謂

其地形為玉杯云玉杯一破無復全至德裕貶其家

滅矣

盧氏雜說

按楊執一宅亦在是坊

裴遵慶宅

在昇平坊

馬志

遵慶罷相知選朝廷優其年

德令就第注官自宣平坊榜引士子以及東市兩階

時人以為盛事

國史補

柳公綽宅

在昇平坊

馬志

公綽子仲郢每遷官羣鳥大

集於第之庭木榮戟皆滿五日而散家人以為候惟

除天平軍馬節度後鳥不復集遂卒於鎮

長安志

潘孟陽宅

在昇平坊

馬志

孟陽盛治第舍帝微行至樂

游原望見之以問左右孟陽懼輟不敢治

唐書潘孟陽傳按

魏少游宅劉沔宅俱在是坊

胡証宅

在修行坊証嶺南節度使在鎮好修劍自奉

修行坊第連亘閭巷議者非之李訓敗衛軍利其貯

聲言賈餗匿其家爭入剽劫

長安志

楊叔宅

在修行坊

馬志

叔兄發弟嚴皆顯貴號修行楊

家與靖恭諸楊相比

長安志

按鄭宜遵宅杜從則宅李建宅俱在是坊

十六宅

在安國寺東附苑城為大宅分處十王謂慶

忠隸鄂榮儀台潁永濟也後盛壽陳豐常涼六王又

就封入內宅是為十六宅後以諸孫成長又置百孫

院

雍錄

崔琳宅

在興寧坊

馬琳

祖義元父神慶伯父神基皆

為相其父昆弟之子洎其自出參朝宴者數十人鳴

玉啟道自興寧里詣大明宮冠蓋相望時人屬目

長安

志

按姚崇宅王毛仲宅泉

南生宅李愬宅俱在是坊

李綱宅

在永嘉坊綱子孫茂盛四代總麻服同居朝

廷美之

長安志 按張文瓘宅韋元炎宅申王撝宅
咸王千里宅蔡國公主宅甯希玠宅涼國公

主宅俱

在是坊

楊汝士宅

在靖恭坊與其弟虞卿漢公魯士同居號

靖恭楊家為冠蓋盛族

長安志

符璘宅

璘賜靖恭里第藍田田四十頃

長安志

崔彥昭宅

在靖恭坊

長安志

靖恭崔公尚書為樂卿自

靖恭宅露冕從扳輿入太常觀者樂之

秦中記

按楊慎交宅王

敬從宅韋建宅韋渠牟宅吳通微集書院史憲誠宅金州進奏院俱在是坊

牛僧孺宅

在新昌坊

馬志

牛相新昌宅泓師號為金碗

言金或傷庶可重製本將作大匠康詵宅詵自辨崗

阜形勢以其宅當出宰相後每命相必引領望之宅

竟為牛所得

續前
定錄

楊於陵宅

在新昌坊

馬志

楊損家新昌里與路巖第接

巖為相欲易廐以廣第損族仕者十餘人議曰家世

盛衰係權者喜怒不可拒損曰今尺寸土皆先人舊

貲非吾等所有安可奉權貴耶窮達命也卒不與

唐書

楊損傳

按於陵子嗣復嗣復子損損宅即於陵所

傳也又張仲方宅溫造宅盧宏宣宅路巖宅俱在是坊

殷開山宅

顏師古宅

在敦化坊

馬志

貞觀永徽間太

常少卿歐陽詢著作郎沈越賓亦在此坊殷顏南朝
舊族歐陽與沈又江左士人時人呼此坊為吳兒坊

長安志

按韋武宅鄭

國夫人宅俱在是坊

程懷直宅

在安業坊貞元十年賜懷直甲第一區妓

女一人令歸滄州初懷直自滄州歸朝德宗賜務本

里宅又賜安業里別宅有池榭林木之盛

長安志

張去奢宅

在安業坊弟去逸去盈同時三品亦號三

戟張家

長安志 按息國公主宅亦在是坊

王鉞宅

在太平坊

長安志

則天以後王侯妃主京城第

宅日加崇麗御史大夫王鉞有罪賜死縣官簿錄鉞

太平坊宅數日不能遍宅內有自雨亭從簷上飛流

四注當夏處之凜若高秋又有寶鈿井欄不知其價

他物稱是

封氏見聞記

按舒王元名宅節敏太子妃楊氏宅王源中宅羅言宅裴垣宅俱在

是坊

劉相國宅

在通義坊本文宗朝朔方節度使李進賢

舊第後進賢徙居長興其宅互為他人所有相國以

十千稅焉及竄於日南謫居四年方獲清雪未久復持鈞軸或將甲第為獻竟無所受復於此寓居庭宇不加修飾清風儉德充塞寰宇

劇談錄 按李思訓宅楊纂宅崔鉉宅俱

在是坊

裴吳宅

延壽坊東隅駙馬裴吳宅高祖末裴行儉居

之自行儉以前居者輒死行儉卜居有狂僧突入髡其庭中大柳樹中有豕走出徑入北鄰其家數日暴死

盡此宅清宴

兩京記 按成安公主宅亦在是坊

京兆府解 在光德坊東南隅府內解宇並隋開皇中

制度其後隨事改作

長安志

崔邠宅 在光德坊邠與弟沂西觀察使鄆金吾大將

軍鄆及宰相淮南節度使鄆皆貴顯同居光德舊第

鄆嘗搆便齋宣宗聞而嘆曰崔氏一門孝友可為士

族之法因題曰德星堂後京兆民即其里為德星社

長安志

按劉仁軌宅鄆陽公主

宅裴迥宅劉崇望宅俱在是坊

闔立本宅

在延康坊

馬志

後申王傳符太元居之西亭

有立本畫山水

長安志

諸王府 寶歷二年以延康坊官宅一區為諸王府唐

朝故事王府在王京師即合有曹局自天寶以後王

不出閣所置寮采過於閒冗其胥吏數司方共一員

至是瓊王府長史裴簡求奏論遂創官府

長安志按是坊有

隋楊索宅

盧懷慎宅

在崇賢坊懷慎居官清儉宅在陋巷屋宇

不蔽風雨

長安志按虎王邕宅寶瑗宅俱在是坊

瓊山縣主宅 在延福坊縣主開元中適慕容氏即吐

谷渾之苗裔富於財產宅內有山池院谿磴自然林

木翳鬱京城稱之

長安志 按宣平府
真化府俱在是坊

宗楚客宅 在醴泉坊馬志楚客造第新成皆是文柏為

梁沉香和紅粉以泥壁開門則香氣蓬勃磨文石為

堦砌及地着吉莫靴者行則仰仆楚客兄弟配流太

平公主就其宅看嘆曰看他行坐處我等虛生浪死

景龍中為中書令韋氏敗斬之

朝野
僉載

長安縣廨

長壽坊西南隅長安縣廨去府六里

長安志

按楊溫宅尉遲敬德宅俱在是坊

劉道祥宅

在居德坊宅接先天寺據漢園丘舊址因

其高築亭焉

長安志

同昌公主宅

咸通九年同昌公主出降宅於廣化里

房櫳戶牖以衆寶飾之

唐書同昌公主傳按太華公主宅義陽公主宅韓滉宅

岐陽公主宅

俱在是坊

李義琰宅

義琰宅至編監雖居相位在官清儉竟居

方丈之室高宗聞而嗟嘆遂勅匠作造堂以安靈座

焉

長安志

王家富窟 王元寶都中巨豪也嘗以金銀疊為屋壁上以紅泥泥之於宅中置一禮賢堂以沉檀為軒檻以砥砢甃地面以錦文石為柱礎又以銅線穿錢甃於後園花徑中貴其泥雨不滑也四方賓客所至如歸時人呼為王家富窟

開元遺事 按富窟及李義琰宅俱未詳坊里姑附之以俟考

訂

按唐京城中府第最夥如光福坊則有竇參宅魏國公賈耽宅南充郡王伊慎宅蘭陵坊則有韋待價宅李珣宅靖安坊則有咸宜公主宅崔倫宅武元衡宅韓愈宅劉伯芻宅李宗閔宅昌樂坊則有屈突通宅安德坊則有蘇萬宅桑道茂宅來庭坊則有王仁祐宅高延福宅梁守謙宅安興坊則有韋安石宅朱泚宅通濟坊則有桓彥範宅宣平坊則有李秀宅嚴綬宅羅珣宅鄭朗宅劉遵占宅修政坊則有張九齡宅常樂坊則有來濟宅張九皋宅和政公主宅郭敬之宅錢徽宅修德坊則有李抱玉宅光行坊則有宇文經野宅魚朝恩宅興化坊則有封德彝宅邵王守禮宅孟溫禮宅懷真坊則有畢構宅唐休景宅韋謙宅宣義坊則有張說別宅李逢吉宅豐安坊則有裴寬宅安樂坊則有李希烈宅布政坊則有魏知古宅蕭嵩宅寶璣宅舍利澄宅敦義坊則有李光弼宅大通坊則有竇連山宅安定坊則有第五守進宅休祥坊

則有武三思宅永平坊則有宣誠公主宅長安公主宅歸義坊則有蜀王秀宅普寧坊則有李勣宅韋機宅義寧坊則有戴至德宅羣賢坊則有昭容上官氏宅懷德坊則有李至道宅雖其事迹湮沒然古人遺趾所托按其坊第皆可考而知也故悉附之

李靖宅 在三原縣宅有古碑斷缺又云自清涼原折

而西乃唐李靖故居其地屬涇陽今從本傳韋端符

觀李衛公故物記云二年冬端符於三原令坐中揖

其羣官有客曰李彥芳是衛公之胄也其家傳賜書

與他服器十餘物俱無恙

賈志

司竹監 在盤屋縣東三十里穆天子傳曰天子西征
至元池奏廣樂三日是曰樂池乃植之竹史記曰渭
川千畝竹漢謂秦池有鄠杜竹林晉地道記司竹都
尉治鄠縣其園周一百里以供國用唐置司竹監丞
掌之隋義寧元年唐高祖起兵其第三女平陽公主
舉兵於司竹園號娘子軍

長安志

宋嘉祐中蘇軾至盤

屋適冬月司竹監燒葦園都巡檢柴貽勗左藏以其

徒會獵園下軾有詩明設司竹局以大使典之

馬志

新食堂 在盤屋縣右遺趾不存柳子厚撰記云貞元

十八年五月作新食堂於縣內之右始會食也

馬志

蘇尚書宅 在富平縣弘化坊宅門獅腹鐫云明昌元

年蘇仲蘇千明隆慶初耕者獲銀觴於宅隅名如獅

腹

賈志

折衝府 在蒲城縣唐建府有五曰相原孝德溫泉宣

化懷仁按相原今之賢相鄉舊管勲貴里者又有崇

德善德懷仁各鄉即孝德宣化懷仁諸府由名也

賈志

伏龍府 在澄城縣南五十里唐置兵之所太宗時太

原王榮為伏龍府折衝

賈志

孫思邈宅 今為僧寺在殺棚縣東五里流惠鄉惠政

坊啟玉山

長安志按宅在今耀州

柳公權宅 在耀州北四十里宅廢今名為柳家原宅

旁有公權瘞筆塚

賈志

桑道茂宅 在乾州道茂所居宅有二柏甚茂曰木盛

則土衰土衰則人病乃埋鐵數千斤其下以制之今

城西有道茂遺蹟並祠堂故址

賈志

古翰坊 在乾州治中為陸宣公草詔之所後人因建

坊

乾州志

韋應物宅 應物長安人漁陽兵亂流落失職屏居武

功相傳渭濱是其故宅應物有經武功故宅詩

賈志

杜甫草堂 在鄜州南六十里杜甫避難寓此即三川

也又州西北三十里羌村有杜窟壁上詩甚多

延安府志

幽陵都督府 在神木縣城西几十里唐開元中置

葭州

志

青碌局 在興安州西一百五十步碧鈿青碌諸洞凡

二十餘處唐宋以來歲辦採至明始停閉改為預脩

倉今廢

賈志

宋

冠準宅 新說曰府城掖庭街有冠萊公宅中有山池

熙熙臺後為寺號安衆禪院中有萊公祠堂

馬志

种放宅 新說曰府城街後有种太尉宅中有奎鈞慶

賜之閣下東壁畫晉王羲之蘭亭圖西壁繪廬山遠

公白蓮社圖

馬志

青蓮堂

新說曰堂在省衙蓮池宋陳堯咨建今改為

總庫

馬志

空翠堂

在鄠縣西五里漢陂堤上其中有唐杜甫題

漢陂歌石刻在焉

馬志

空翠堂取杜甫漢陂行絲管咽

啾空翠來之句

馬志

在漢陂北岸宋知縣張伋撰記久

而堂廢明嘉靖間御史方新使鄠令王瑋重造前有

紫閣後有菱池氣象清幽松竹叢中水磨之聲不絕

賈

志

避世堂

在整屋縣東南二十五里南溪上今廢宋蘇

軾序云南溪之南竹林中新構一茅堂予愛其所處

最為深邃故名避世堂有詩

馬志

寇萊公宅

在下邳城內今普照寺相傳即其遺址

賈志

凌虛臺

在鳳翔府東宋陳希亮知鳳翔時建判官蘇

軾記在府治後堂壁

名山記

嘯歌堂 在鳳縣宋建取黃庭堅嘯歌山川重之句為

名

賈志

勸忠堂 在興安州宋時建久廢明成化十五年州守

鄭福構堂積圖書植花卉瓜蔬為退思宴賓之所今

復廢

馬志

望輝堂 在耀州東鑑山年豐則有光如鑑故登此堂

以望之

馬志

堂在耀州署後宋皇祐中華原令楊庭見

寶鑑山常有光如鑑乃築臺望之臺西即宋時州守

園居故有樓亭池臺花竹之盛今盡蕪沒惟雷簡夫

園居詩二十二首石刻存

賈志

思政堂 在乾州公署中宋時本州刺史鄭彥文建

馬志

眉壽堂 在邠州西北隅宋范文正公建臨西湖湖上

有古幽亭

蒙宇記

公劉以農事開國邠風葵棗之化流

浹至今鑿井耕田野無隋農歲有高廩為此春酒以

介眉壽斯民熙熙然躋和氣之域因以名堂

范仲淹眉壽堂

記幽亭在雉堞之旁俯觀湖水波濤湧起舟楫往來

一州之偉觀也

邠州志

金

張中孚宅

新說曰府城草場街有金紫光祿大夫張

中孚宅中有頤真堂後為錢監元為利用倉

馬志

衆樂堂

新說曰衆樂堂在興慶池北金朝金紫光祿

大夫張中孚建與賓客晏遊處今廢

馬志

流杯亭

在衆樂堂後金太尉張金紫所構砌石成風

字樣曲水流觴以為祓禊宴樂之所

賈志

元

成德堂 新說曰長安府學成德堂七門八楹高敞雄

壯元末已壞明宣德中建為明倫堂

馬志

采芹堂 在成德堂後貯官書文籍

馬志

雙桂堂 新說曰在京兆景風里至大甲申張浩然二

子琚珪同榜及第長安令王公有題詩

馬志

趙氏鄉學 在臨潼縣北櫟陽元季工部尚書趙諒建

有太史歐陽玄所作碑

馬志

柳塘 在鄠縣南山下元楊奐隱居教授其徒植柳千

株有清風閣讀書堂

馬志

歸來堂 在乾州元楊紫陽先生佚老之所

州志

元岳崧讀書院

在橋頭河卧虎岡元延祐中三聘不

起鄉人頌之曰隱姓埋名岳景山嘗讀書於橋頭河

之卧虎岡與蕭軒友善博學好古嘗著六經四書解

自覺不及程朱遂毀之

鄠陽志

明

秦王府 在西安府城中之左洪武初命長興侯耿炳

文修洪武三年四月初七日封愍王之國於秦

雍大記

永興郡王府 在秦府西南一里

雍大記

保安郡王府 在秦府之西

雍大記

興平郡王府 在秦府西南二里

雍大記

永壽郡王府 在秦府西南二里有勅建書樓

雍大記

宜川郡王府 在秦府西南三里小池坊

雍大記

臨潼郡王府 在秦府國東城之外洪武中為蒲城郡

主府第

雍大記

邵陽郡王府

在秦府東南三里

雍大記

汧陽郡王府

在秦府西北半里

雍大記

潛西草堂

在渭南縣潛水西岸明知府南大吉敷教

舊址

賈志

劉孝子故居

在長武縣西南現里成化中旌表里名

孝村其灘曰孝子灘

長武志

園林

周

靈囿

文王囿也在長安西四十里跨今長安鄠縣之

境

雍勝畧

周靈囿文王囿也詩曰王在靈囿麀鹿攸伏

毛長注曰囿所以域養禽獸也天子百里諸侯四十

里靈者言文王之有靈德靈囿言道行於苑囿也孟

子曰文王之囿方七十里芻蕘者往焉雉兔者往焉

與民同其利也文王靈囿在長安西南四十二里

三輔黃圖

靈臺

在京兆鄠縣周之故臺今鄠縣東五里有鄠宮

又東二十五里有靈圓圓中有臺

左傳注

周靈臺在長

安西北四十里臺高二丈周圍百二十步

三輔黃圖

靈沼在長安西三十里

三輔黃圖

王在靈沼於初魚躍

詩經

大雅

按朱子集註云臺下有圓間中有沼則臺沼並在靈圓中也

秦

獸圈

烈士傳云秦王召魏公子無忌不行於是朱亥

奉璧一雙詣秦王王怒使置亥獸圈中亥瞋目視獸

皆血濺於獸面獸不敢動

名山記

漢

上林苑 即秦之舊苑也其故基跨今盤屋鄠長安咸

寧藍田五縣之境

雍勝畧

蕭相國請曰上林中多空地

願令民得田苑中

史記

武帝微行以為道遠勞苦又為

百姓所患乃使大中大夫吾丘壽王與待詔能用算者舉籍阿城以南盤屋以東宜春以西提封頃畝及其價值屬之南山以為上林苑東方朔諫秦起阿房而天下亂因陳秦階六符之事上乃拜大中大夫卒

起上林苑故相如請為天子遊獵之賦稱鳥有先生

亡是公而奏上林也

水經注

上林苑中廣長三百里苑

中養百獸天子春秋射獵苑中取獸無數其中離宮

七十所容千乘萬騎

漢舊儀

西都則有上林禁苑林麓

數澤陂池連乎蜀漢繚以周墻四百餘里離宮別館

三十六所神池靈沼往往而在

西都賦

上林苑門十二

中有苑三十六宮十二觀二十五

關中記

初修上林苑

羣臣遠方各獻名果異卉二千餘種其中亦有制為

美名以標奇麗也

西京雜記

秦之上林其邊際所抵難以

詳究水經於宜春觀曰此秦上林故地也史記載上林所起曰作朝宮渭南上林苑中先作阿房前殿則宜春觀阿房宮皆秦苑故地也武帝尚以秦苑為狹命吾丘壽王舉籍阿城以南蓋屋以東宜春以西悉除為苑則所拓比秦益大矣以漢唐郡縣言之則蓋屋一縣不盡入苑而鄠杜兩縣悉歸包并矣其曰舉籍阿城以南而阿城之北則不在數是其疆境至渭水

南岸而極也至揚雄則曰武帝廣開上林南至宜春
鼎湖御宿昆吾長楊五柞並南山北繞黃山潁渭而
東則苑境不止限乎渭南矣蓋謂踰渭而北又向東
皆為苑地也此雄之誤也渭北有苑百八十里西向
而八扶風周回五百餘里此則渭北之苑也以舊儀
黃圖考之自名甘泉苑不名上林苑也當時揚雄但
見夫渭南北皆有苑矣而渭北之苑又復有宮如黃
山宮之類故誤言之耳東方朔傳壽王所載截自阿

城以南元不跨渭此最疆界之可証也張衡賦西京上林曰繞黃山而歛牛首牛首可歛矣而黃山可繞乃據行幸言之非上林位置也

雍錄

承華殿 七月七日上林承華殿齋正中忽有一青鳥

從西北方來甫頃王母至

漢武故事

鳳皇殿 宣帝神爵四年鳳皇集上林廼作鳳皇殿

以答嘉瑞

長安志

平樂館 武帝元封六年夏京師民觀角抵於上林

平樂館

漢書武帝本紀

平樂館大作樂處

西京賦注

繭館

師古曰漢宮閣疏云上林苑有繭館益蠶繭

之所也

漢書元后傳注

上蘭館

師古曰上蘭館名也在上林中

漢書元后傳注

涿沐館

宣帝許美人居上林涿沐館數召入飾室

中若舍

長安志

礪氏館

上求神君舍之上林中礪氏館

漢書郊祀志

如

淳曰礪音蹄鄭氏曰音斯

郊祀志注

鹿館 外戚傳成帝許美人在上林鹿館數召入飾

室

長安志

新臺 上林賦曰登新臺在豐水西北近渭今鄠縣

也

長安志

清臺 漢志曰武帝造太初厯即上林清臺課候則

清臺在上林苑中矣黃圖曰漢靈臺在長安西北八

里漢始曰清臺後更名曰靈臺郭延生述征記曰長

安宮南有靈臺者高十五仞上有張衡所制渾儀相風

銅鳥又有銅表題云太初四年造呂圖曰漢舊城外
有靈臺北與未央宮對水經亦曰城南漕渠有漢靈
臺故延生書其所見亦曰在宮之南也然則漢世城
西之上林城南之漕渠皆有候景之臺也或曰清臺
或曰靈臺名稱不一耳然銅表之立既在太初即是
武帝定厯之初矣至銅渾儀則云張衡所造衡所造
地動儀在漢順帝陽嘉四年其時帝都不在長安或
者衡儀已成亦分置長安候臺耶

雍錄

蠶室 咸宣怒其吏成信信亡藏上林中宣使郿令

將吏卒闌入上林中蠶室門

長安志

延壽門 平帝迎王皇后自上林延壽門入未央宮

前殿

長安志

昆明池 在長安縣西南三十里豐邑鄉鵲鵲莊

勝雅

畧 昆明池漢武帝元狩四年穿圖曰上林苑有昆明

池

三輔皇圖

越欲與漢用船戰遂乃大修昆明池列觀環

之治樓船高十餘丈旗幟加其上甚壯

史記平準書

昆明

池漢武習水戰也中有靈沼神池云堯時理水訖停

舟於此蓋堯時已有汙池漢代因而廣深耳

關中記

武

帝作昆明池欲伐昆吾教習水戰因而於上遊戲養

魚給諸陵廟祭祀池周圍四十里

西京雜記

昆明池蓋三

百二十五頃池中有豫章臺及石鯨刻石為鯨魚長

三丈每至雷雨常鳴吼鬣尾皆動立石牽牛織女於

池之東西以象天漢

三輔故事

武帝欲通西域為昆明所

閉隔聞昆明有滇池方三百里鑿此池習水戰期以

伐之中有樓船上建樓櫓又有戈船上施戈矛四角
悉垂幡旄於葆蓋照觸涯涘其始鑿也固以習戰
久之乃為遊玩之地耳三輔故事曰池周三百二十
頃長安志曰今為民田夫既可為民田則原非有水
之地矣然則漢時於何取水也長安志引水經曰交
水西至石碣武帝穿昆明池所造有石闔堰在縣西
南三十二里則昆明之周三百餘頃者用此堰水也

錄
雍

豫章觀 武帝造在昆明池中亦曰昆明觀蓋武帝
所置桓譚新論云元帝被疾過求方士漢中送道士
王仲都詔問所能曰能忍寒乃以隆冬盛寒日令袒
載駟馬於上林昆明池上環以冰而御侍者厚衣狐
裘寒戰而仲都無變色卧於池上曛然自若即此觀
也

三輔
黃圖

昆明池中有龍首船常令宮女泛舟池中張

鳳蓋建華旗作櫂歌雜以鼓吹帝御豫章觀臨觀焉

三輔
故事

昆靈池

上林有昆靈池

初學記

漢武帝始穿昆靈之

池泛翔禽之舟帝自造歌曲使女伶歌之時日已西

傾涼風激水女伶歌聲甚道因賦落葉哀蟬之曲帝

息於延涼室夢李夫人授以蘅蕪之香帝驚起而香

氣猶著衣冠遂改延涼室為遺芳夢室

拾遺記

百子池

上林有百子池

初學記

戚夫人侍兒賈佩蘭

後出為扶風段儒妻說在宮內時七月七日臨百子

池作于聞樂樂闋以五采縷相羈謂之相連愛

三輔

黃圖

積草池

上林苑有積草池池中有珊瑚樹高一丈

二尺一本三柯上有四百六十二條南越王趙佗所

獻號為烽火樹至夜景常煥然

三輔黃圖

蒯池

上林苑蒯池生蒯草以織席

漢武故事

牛首池

濯鷁牛首

上林賦

張揖曰牛首池名也在上

林苑西頭師古曰濯者所以刺舟也鷁即鷁首之舟

也

上林賦注

野韭澤即漢牛首池地在內苑西豐水西北

篆字

記

西陂池 三輔黃圖曰長安有西陂池東陂池郎池

皆在上林苑中

雍大記

飛廉觀 在上林苑武帝元封二年作飛廉神禽能

致風氣者身似鹿頭如雀有角而蛇尾文如豹武帝

命以銅鑄置觀上因為名班固漢武帝故事曰公

孫卿言仙人好樓居於是上於長安作飛廉觀高四

十丈

三輔

黃圖

楊祿觀柘觀 班婕妤生子楊祿觀柘觀師古曰二

觀並在上林中

長安志

雲林館包陽館犬臺館當路館鼎郊觀朗池觀博望

觀樛木觀便門觀元華觀益樂觀華元觀明光觀

以上

並在上林苑中
見三輔黃圖

博望苑 武帝為戾太子立博望苑使通賓客苑在漢

長安城外漕渠之北至唐則為長安縣北五里此特
招致賓客之所耳太子之奔湖也斫覆盎城門而出

覆盜門者漢城南面東頭第一門也苑在門外而太子斫門以出則知博望非常居之地也此苑至成帝

始撤去

雍錄

御宿苑

在長安城南御宿川中漢武帝為離宮別館

禁御人不得入往來遊觀止宿其中故曰御宿三秦

記云御宿苑出栗十五枚一勝大梨如五勝落地則

破其取梨先以布囊承之號曰含消此園梨也

三輔黃圖

宜春下苑

在京城東南隅

三輔黃圖

宜春之名漢史凡三

出有曰宜春苑者地屬下杜有曰宜春宮者即下杜苑中宮也有曰宜春觀者則在鄠縣雖三其名而實止兩地也東方朔傳曰武帝東遊宜春師古曰宜春在長安城東南又曰杜縣東即唐曲江也又曰宜春近下杜史記秦紀曰子嬰葬二世杜南宜春苑司馬相如從武帝至長楊獵還過宜春奏賦以哀二世其賦曰臨曲江之隍州望南山之參差末云弔二世持身之不謹兮墓蕪穢而不修也合數者言之則二世

之所葬相如之所賦漢之曲州唐之曲江皆此下杜之宜春也其苑若宮皆秦創而漢唐因之也至於宜春觀者則在長安之西鄠縣滂漾二水之旁上林故地也說者誤以下杜之宮為鄠縣之觀則失之矣故師古於東方朔傳明辨之曰在鄠縣者自是宜春觀耳在長安城西豈得言東遊其說極為允篤貢禹傳元帝用禹言罷宜春下苑以假貧民此則下杜之苑矣故揚雄傳曰雖頗割其三垂以贍貧民者即指元

帝所罷之苑也既曰下苑則必別有上苑矣頗割三

垂則彼之一垂尚包苑中也耶

雍錄

樂遊苑 樂遊原上有樂遊苑一曰樂遊園去咸寧縣

南八里

雍勝畧

宣帝神爵二年春起樂遊苑

漢書宣帝本紀

師

古曰三輔黃圖云在杜陵西北又關中記云宣帝立

廟於曲江之北號樂遊按其處則今之所呼樂遊廟

者是也蓋本為樂遊苑後因立廟

宣帝本紀注

宣帝樂遊

廟亦名樂遊原亦名樂遊苑地基最高四望寬敞

西京雜記

黃山苑 雲當朝請數稱病私出多從賓客張圍獵黃

山苑中

漢書霍光傳

袁廣漢園 茂陵富人袁廣漢藏錙巨萬家僮九百人

於北邙巖築園東西四里南北三里激流注其內構

石為山高十餘丈連延數里養白鸚鵡紫鴛鴦旄牛

青兕廣漢後有罪誅没入官為園鳥獸草木皆徙入

上林苑

西京雜記 按北邙巖在今興平即始平原也

御羞苑 漢書武帝元鼎二年初置水衡都尉掌上林

苑有五丞屬官有御羞苑禁圃令丞如淳曰御羞地

名在藍田其土肥沃多出御物可進者師古以為即

御宿川非是

賈志

甘泉苑

在淳化縣北車盤嶺

賈志

武帝置緣山谷行至

雲陽三百八十一里西入扶風凡周回五百四十里苑

中起宮殿臺閣百餘所有仙人觀石闕觀鵠鵲觀

三輔

黃圖

梨園

即今淳化縣城

賈志

車箱坂下有梨園漢武帝築

大一頃樹數百株青翠繁密望之如車蓋

雲陽宮記

昭祥苑 在甘泉宮西周回十里萬國獻異物皆集此

中

洞冥記

西郊苑 漢西郊有苑圓林麓數澤連亘繚以周垣四

百餘里

三輔黃圖

思賢苑 西京雜記曰文帝為太子立思賢苑不知苑

屬何地

雍錄

文帝為太子立思賢苑以招賓客中有堂

隍六所客館皆廣廡高軒屏風幃褥甚麗

博物志

魏

顏斐菜園

斐字文林為京兆守於府下起菜園使吏

簡拔鋤治也

魏志

晉

逍遙園

姚興常於逍遙園引諸沙門聽番僧鳩摩羅

什演講佛經起逍遙宮殿庭左右有樓閣高百尺相

去四十丈以麻繩大一圍兩頭各絰樓上會日令二

人各從繩上行過以為佛神相遇

長安志

澄元堂 在逍遙園中鳩摩羅什演經所

長安志

周

華林園 庾子山有華林園馬射賦徐樹穀曰周明帝

紀武成二年三月會羣公列將卿大夫及突厥使者

於芳林園賜錢帛各有差園在長安明矣賦稱歲次

昭陽繫辛巳年乃武帝保定元年蓋武帝初即位踵

行故事而史偶失書耳按魏志云芳林園避少帝諱

改曰華林園是則鄴下先有芳林園後周無諱當避

而此賦亦改芳為華未詳何故

庾子山集

仙人藥園

在漢陰縣南二十五里周地圖云龍子山

疊嶂凡十一層上有仙人藥園

賈志

隋

大興苑

開皇元年置

長安志

在宮城之北即唐禁苑也

賈志

芙蓉園

本古曲江文帝惡其名曲改名芙蓉園為其

水盛而芙蓉富也

劉餗小說

芙蓉在京城東南隅有青林

重複緣城瀾漫蓋帝城勝境駕時幸之

景龍文館記

隋營

京城宇文愷以京城東南隅地高故闕此地不為居
人坊巷鑿之為池以厭勝之又會黃渠水自城外南
來可以穿城而入故隋世遂從城外抱之入城為芙
蓉池且為芙蓉園也

雍錄

西苑 隋煬帝大業元年築西苑周三百里其內為海
周十餘里為方丈蓬萊瀛洲諸山高出水百餘尺臺
觀宮殿羅絡山上向背如神海北有龍鱗渠縈紆注
海內緣渠十六院門皆臨渠每院以四品夫人主之

堂殿樓觀窮極華麗宮樹秋冬彫落則剪綵為華葉綴於枝條色渝則易以新者常如陽春沼內亦剪綵為荷枝菱茨乘輿遊幸則去冰而布之十六院競以殽羞精麗相尚求市恩寵上好以宮女月夜數千騎遊西苑作清夜遊曲於馬上奏之

緒世說

西苑池在長

安城中

雍大記

唐

禁苑 在宮城之北東西二十七里南北三十三里東

接灞水西臨長安故城南連京城北枕渭水苑西即
太倉北距中渭橋與長安故城相接東西十三里南
北十三里亦隸苑中苑中四面皆有監南面太樂監
北面舊宅監東監西監分掌宮中植種及修葺園囿
等事又置苑總監領之皆隸司農寺苑中宮亭凡二
十四所南面三門中曰景曜東曰芳林西曰光化東
面二門南曰光泰北曰昭遠西面二門南曰延秋北
曰玄武北面三門中曰啟運東曰飲馬西曰永泰

長安

志

雍錄曰唐大內有三苑西內苑東內苑禁苑皆在
兩宮北而有分別西內苑並西內太極宮之北東內
苑則包大明宮東北兩面兩內苑北門之外始為禁
苑之南門按程大昌云兩內苑北門之外始為禁苑
南門非也考長安志則禁苑者其總名而內苑則在
禁苑中如京城之中有宮城故云苑北啟運門南有
內苑是在禁苑景曜門北啟運門南也東內苑後置
故加東字以別之又大昌云大明宮基取禁苑中射

殿地為之則東苑雖在大明宮東而實總屬禁苑中
也故長安志叙禁苑云東接灊水西接長安故城內
苑東內苑相比而列於禁苑中是又不可分稱三苑
也

雍勝
畧

內苑 啟運門之南有內苑北曰重元門東曰東雲
龍門西曰西雲龍門自玄武門北至重元門一里東

西與宮城齊

長安
志

南望春亭北望春亭 在禁苑東南高原之上舊志

多云望春宮其東正臨漣水也天寶元年韋堅因古迹堰渭水絕漣灞為潭東注永豐倉下以便漕運名廣運潭未幾漣灞二水沙泥衝壅潭不可漕付司農掌之為捕魚之所

雍錄

魚藻池 深一丈在禁苑中貞元十三年詔更淘四尺引灞河天濠水漲之在魚藻宮後穆宗以觀競渡雍大王建宮詞云魚藻宮中鎖翠蛾先皇行處不曾過而今池底休鋪錦菱角鷄頭積漸多先皇德宗也

記

池底張錦引水被之令其光豔透見也德宗亦已奢

矣

雍錄

蠶壇亭

在苑之東皇后祈先蠶之所

長安志

青門亭

去宮城十三里在長安故城之東即邵平

種瓜之所

長安志

櫻桃園

在禁苑之南又有東西葡萄園

賈志

臨渭亭

禁苑內苑有臨渭亭

長安志

景龍四年四月

甲寅幸臨渭亭修禊飲

舊唐書中宗本紀

桃園亭 去宮城四里隸舊宅監所領

長安志

咸宜宮未央宮 禁苑內苑有咸宜宮未央宮二所
皆漢之舊宮也去宮城二十一里唐置都邑之後因
其舊址復增修之宮側有未央池漢武庫及樗里子
墓武宗會昌元年因遊畋至未央宮見其遺址詔葺
之尚有殿舍二百四十九間作正殿曰通光殿東曰
詔芳亭西曰凝思亭立端門命翰林學士裴素撰記

隸舊宅監所領

長安志

梨園 在光化門北光化門禁苑南面西頭第一門
在芳林景曜門之西也中宗令學士自芳林門入集
於梨園分朋拔河則梨園在太極宮西禁苑之內矣
開元二年置教坊於蓬萊宮上自教法曲謂之梨園
弟子至天寶中即東宮宜春北苑命宮女數百人為
梨園弟子是梨園者按樂之地預教者名為弟子凡
蓬萊宮宜春苑皆不在梨園之內也長安志曰文宗
幸北軍因幸梨園又令太常卿王涯取開元雅樂選

樂童按之名曰雲韶樂樂成獻諸梨園亭帝按之會
昌殿此會昌殿即在梨園中矣唐末芳林十哲即自
此門入交中官故十人者冠戴芳林名號如鴻都賦
徒也

雍錄

南昌國亭北昌國亭流杯亭 在未央宮北漢之舊

址隸舊宅監所領

長安志

坡頭亭柳園亭月坡毬塲亭子青城橋新鱗橋栖雲
橋凝碧橋上陽橋正興亭元沼亭神臯亭七架亭明

水園

以上皆內苑所有見長安志

東內苑 南北二里與大明宮城齊東西盡一坊之

地南即延政門北即銀臺門東即太和門

長安志

龍首池

東內苑有龍首池

長安志

元和十三年三月

浚龍首池

會要

玄宗先天二年三月甲戌帝以旱親往

龍首池祈禱有赤蛇自池而出雲霧四布應時雨

實錄

靈符應聖院

在龍首池東

長安志

凝碧池

在東內苑

雍大記

祿山亂逆徒張樂於此樂

工雷海青不勝憤擲樂器慟哭王維陷賊被拘僧寺

聞之為詩曰萬戶傷心生野煙百官何日再朝天秋

槐落葉深宮裏凝碧池頭奏管絃

雍錄

永寧園 在永寧坊賜祿山永寧園為邸又賜永穆公

主化觀為游燕地

長安志

奉誠園 司徒兼侍中馬燧宅在安邑里燧子少府監

暢燧貲甲天下暢亦善殖財貞元末神策尉楊志虔

諷使納田產遂獻舊第為奉誠園

長安志

裴向竹園 在新昌坊元和中宰相武元衡遇害或告

匿於新昌坊向之竹林者

長安志

度支亭子 在永達坊輦下歲時記新進士牡丹宴在

永達亭子

長安志

家令寺園 在昌明坊貞觀中日南王入朝詔於此營

第尋還國宅遂廢復為園

長安志

馬璘池亭 在崇賢坊璘卒池亭入官貞元後羣臣多

賜宴於此

長安志

郭子儀園

在大安坊後為岐陽公主別館

長安志

曲江池

去咸寧縣南一十里本秦隴州漢之宜春下

苑也

雍勝畧

曲江池其水曲折有似廣陵之江故名之

寰宇記

朱雀街東第五街皇城之東第三街昇道坊龍

華尼寺南有流水屈曲謂之曲江

西京記

曲江開元中

疏鑿遂為勝境其南有紫雲樓芙蓉園其西有杏園

慈恩寺花卉環周煙水明媚都人遊玩盛於中和上

巳之節綵幄翠幃匝於堤岸鮮車健馬比肩擊轂上

已賜宴臣僚京兆府大陳筵席長安萬年兩縣以雄
勝相較錦繡珍玩無所不施百辟會於山亭恩賜太
常及教坊聲樂池中備綵舟數隻唯宰相三使北省
官與翰林學士登焉傾動皇州以為盛觀入夏則菰
蒲蔥翠柳陰四合碧波紅蕖湛然可愛好事者賞芳
辰翫清景聯騎攜觴疊疊不絕

劇談錄

曲江宴唐初設

以慰下第舉人其後弛廢而進士會同年於此開元
時造紫雲樓於江邊至期上率宮嬪垂簾觀焉命公

卿士庶人酺各攜妾妓以往倡優縑黃無不畢集先期設幕江邊是日商賈皆以奇貨麗物陳列豪客園戶爭以名花布道進士乘馬盛服鮮制子弟僕從隨後率務華侈都雅推同年俊少者為探花使有匿花於家者罰之開元天寶間旁有殿宇安史亂後盡圯廢文宗覽杜甫詩云江頭宮殿鎖千門細柳新蒲為誰綠因建紫雲樓落霞亭歲時賜宴又詔百司於兩

岸建亭館

春明退朝錄

曲江亭在府城東曲江池西南

名山

記

杏園

曲江池西即杏園

玉海

大中元年正月勅進士放

榜後杏園依舊宴集

會要

韋曲

在咸寧縣南二十里樊川唐韋安石別業林石

花亭號為勝地

雍勝畧

韋曲花無賴家家惱殺人

杜甫詩

杜曲

在啟夏門外向西少陵原也杜甫詩曰杜曲花

光濃似酒

雍錄

杜曲去咸寧縣南三十里樊川韋曲東

十里有南杜北杜杜固謂之南杜杜曲謂之北杜按

二曲名勝之地韋杜二家歷代顯宦故唐人語曰城

南韋杜去天尺五

雍勝畧

唐岐公佑郊居山水形勝草

木花塢為極勝佑以太保致仕與昆仲時賢遊縱其

間

賈志

九曲池 在長安城西興慶池西唐寧王山池院引興

慶水西流疏鑿屈曲連環為九曲池上築土為基疊

石為山植松栢有落狻岩栖龍岫奇石異木珍禽怪

獸畢有又有鶴州仙渚殿宇相連左滄浪右臨漪王

與宮人賓客宴飲弋釣其中

雍大記

定昆池

本安樂公主西莊也在京城延平門外景龍

初命司農卿趙履溫為公主疏園植果中列臺榭憑

空架迴棟宇相屬又勅將作監少監楊務廉引水作

沼延十數里時號定昆池通典曰安樂公主恃寵請

昆明池中宗不與公主怒自以家財別穿地號曰定

昆景龍中中宗幸焉

雍大記

何將軍山林

今謂之塔坡少陵原乃樊川之北原自

司馬村起至此而盡其高三百尺在杜城之東韋曲之西山林久廢上有寺浮圖亦廢俗呼為塔坡唐杜

甫題何將軍山林有詩

馬志

逍遙公別業 韋嗣立東山之側有別業馬上聞而賞

之乃命千官飲乎池上即席拜逍遙公名其居曰清

虛原幽棲谷

張說東山記

韋嗣立構別廬於驪山鳳皇原

鸚鵡谷有重崖洞壑飛瀑水中宗臨幸改為清虛原

幽棲谷拜嗣立為逍遙公

唐紀

王維別墅 在輞川地奇勝有華子崗歌湖竹里館柳

浪茱萸泝辛夷塢與裴迪游其中賦詩相酬對

白孔六帖

輞川在藍田縣西南二十里王維別墅在焉本宋之

問別圃也

雍錄

聚遠樓之東有廡廡南有樓臺遶以朱

欄植玉蘭環之題曰木蘭柴

輞川記

大興湯院 藍田西南有地雪落即融唐時有異僧見

之曰必溫泉也已而掘之果然凡病者浴之輒愈後

有白魚之瑞神女屢降立玉女堂於泉側明皇賜名

大興湯院

潛確類書

鳳翔府園 有古槐一株故老云昭宗扶此樹令朱全

忠結襪四顧無應者故至今謂手托槐云

聞見後錄

李茂貞園 在鳳翔府城東北五里唐光啟中茂貞節

度鳳翔時建修竹萬竿內有竹閣旁引水灌入深林

蘇軾詩云朝遊北城東回首見修竹下有朱門家破

墻圍古屋

賈志

宋

白氏莊 宋朝奉郎白序之莊中有八題曰揮金堂順
牛堂疑夢室醉吟菴翠屏閣林泉亭辛夷亭崑桂亭
當時名公來遊皆有題詠白序字聖均自言白侍郎
後金朝為石氏園亭疏泉為方池曲檻有四銀亭八
銀亭至大七年趙尚書過遊有詩後為故中書陝西
四川宣撫使襄山楊忠肅公祠有碑存焉

馬志

姚氏山亭 宋嘉祐中蘇軾自仙遊潭回至黑水見居

民姚氏山亭絕高可愛復憩其上賦詩

馬志

御花園 在渭南縣花園村舊志謂宋太后所置周處

廟碑陰云曹皇后庄

賈志

飛蓋園 在延安府南宋龐籍遊樂處

賈志

元

胡相別墅 在樊川元中書丞胡恭範年老致仕於杜

曲植梅竹引泉鑿池葺治賓館亭臺以為幽棲之所

左圖右書日與士夫宴飲為終焉之計命工繪樊川

歸隱圖翰林待制孟攀鱗為序諸公皆題詩

馬志

廉相泉園

元至元中平章廉希憲行省陝右愛秦中

山水遂於樊川杜曲林泉佳處葺治廳館亭榭導泉
灌園移植漢沔東洛奇花異卉畦分碁布松檜梅竹
羅列成行暇日同姚雪齋許魯齋楊紫陽商左山前
進士邵大用來明之郭周卿張君美樽酒論文彈琴
煮茗雅歌投壺燕樂於此教授李庭之為記征西參

軍畸亭陳還題詩

馮志

趙氏別墅

元至元甲子宣撫趙公於樊川楊坡就崗

原與塏墓考妣樹楸竹前建先廟豎豐碑修葺園亭
導水灌園以為別墅因而家焉自號樊川釣叟中有

安適堂歸潛洞趙公泉

馬志

牡丹園 在安化門西杜城北五里元河東北路行省

郎中并人李煥卿子信之所葺也信之不喜仕進日

涉經史葺園治田樹藝為事園植牡丹三四百株他

花稱是亭臺旁午每花時遊者車馬闐咽

馬志

玉泉園 在澄城縣西北五十里老樹偃仰怪石巉岩

其泉濱涯而出瑩潔如玉雖隆冬水芹夾岸泉下又有疏園藥畦引流灌溉元西臺御史潘汝劼有詩

賈志

明

最樂園

在長安縣西北隅秦藩築此為遊宴之所中

有臺池花榭選勝行樂非貴客騷人不得遊賞名曰

最樂

賈志

西園

在三原縣西北二里有草亭後樂亭三愛園涵

碧池明王端毅公所營

賈志

三愛園在王端毅公後樂

苑中公有三愛圃說謂淵明愛菊茂叔愛蓮李唐人

愛牡丹已則兼愛蓮菊亦嘗居富貴之地於牡丹亦

愛之而不嫌云

馬志

瀑園 明司空南居益建亭池臺榭竹木花卉盡泉原

之勝

賈志

斑竹園 在蓋屋縣東二十里周數頃餘隸秦府內植

斑竹其大如椽其密如簣

馬志

郊垌

上古

華胥渚 在藍田縣北三十五里伏羲氏母居也今有

陵及華胥溝華胥瑤枯棗樹毓聖橋俱存

西安府志

補天臺 在藍田縣東五里許俗傳女媧煉石補之女

媧亦華氏所生

西安府志

流金泊 在涇陽縣北五十里黃帝鑄鼎處帝王世紀

云黃帝鑄鼎於荆山鼎成崩於荆山之陽按閩鄉有

鼎湖驛亦傳為黃帝崩處然此地陽為鼎州其南為

湖縣西為冶谷及仙里仙發諸村則鼎成仙去之迹

甚著况明庭橋陵去此最近當以世紀為定

賈志

軒轅柏 在中部縣軒轅廟考之雜記乃黃帝手植物

圍二丈四尺高可凌霄

延安府志

掛甲柏 在中部縣軒轅廟黃帝滅蚩尤歸而掛甲其

上至今樹皮有掛甲痕柏液中出似有斷釘在內老

幹細枝痕迹若一

延安府志

造書臺 長安縣西三十里三會寺中有臺即倉頡造

書處

雍勝畧

唐西明寺道律師遂靜在京師城南故靜

業寺修道忽有一人來至律師所致敬申禮律師問
今西京高四土臺俗云是倉頡造書臺如何云隸書
字古時已有答曰倉頡於此臺上增土造臺觀鳥跡
者非無其事又有天人姓陸名元暢來謁律師云所
問高四土臺者本迦葉佛於此第三會說法度人至
穆王時文殊目連來化穆王從之即列子所謂化人
者是也化人示穆王云高四臺是迦葉佛說法處因

造三會道場至秦穆公時扶風獲一石佛穆公棄馬
坊中穢汚此象公遊上帝極被責疏覺大怖又欲造
佛像於高四臺南村內得一老人姓王名安年百八
十自云曾於三會道場見人造之臣老無力能作所
住村北有兄弟四人曾於道場內為諸匠執作請追
共造依言作之成一銅像公悅大賞賚之彼人得財
並造功德於土臺上造重閣高三百尺人號高四臺

或曰高四樓

法苑珠林

史官村 在白水縣東北彭衙東二十里村西有利鄉

亭今名史官村史記倉頡居陽武葬衙之利鄉亭南

即此

同州志

履跡坪 在邠州城南門外相傳為姜嫄出祀郊禘履

巨人跡於此

雍勝畧

監巷 在邠州治南相傳生后稷之所詩曰誕置之監

巷牛羊腓字之即此

雍勝畧

狼乳溝

在邠州南俗傳即平林寒泉之地

邠州志

在州

東三十里即棄后稷狼乳處

雍勝畧

唐虞

媯墟 在興安州之梁州故城虞舜嘗居之謂之媯墟

帝王世紀謂之姚墟史記曰舜冀州人生姚墟居媯

汭正義曰按媯州亦冀州城即今畧陽縣漢志畧陽

道屬天水郡十三州志曰畧陽即古冀城也

雍勝畧

石紐村 石泉縣石紐村大禹生此石穴杳深人跡不

到近世掘地得古碑有禹穴二字乃李白所書乃知

會稽禹穴之誤

書蕉按雍勝畧禹穴在洵陽縣與此異

釐亭

在郿縣境

雍勝畧

后稷封釐釐讀如郿或曰鳳翔

府郿縣有台亭

漢書郊祀志注

郿在漆縣其民有會日以相

與夜中市如不為則有災咎

新論

王恉字少林除郿縣

令到官至釐亭長曰亭有鬼數殺過客不可宿也恉

曰仁勝凶邪德除不祥何鬼之避即入亭止宿夜中

聞女子稱冤之聲恉曰有何枉狀可前求理乎女子

曰無衣不敢進恉便投衣與之女子乃前訴曰妾夫

為涪令之官過宿此亭亭長無狀枉殺妾家十餘口
埋在樓下悉盜取財貨恠問亭長姓名女子曰即今
門下游徼者也恠曰汝何故數殺過客對曰妾不得
白日自訴每夜陳冤客輒眠不見應不勝感恚故殺
之恠曰當為汝理此冤勿復害良善也因解衣於地
忽然不見旦召游徼詰問具服罪即狀繫及同謀十
餘人悉伏辜遣吏送其喪歸鄉里於是亭遂清安

後漢

書王
恠傳

夏

三過村

在鄆縣北二十里按地輿志鄆古崇國也連

山易云顓頊五代孫鯀封於崇史記鯀治水功用

不成舜殛於羽山舉禹以代禹痛父罔功八年間三

過其門不入今三過村舊傳即其處也

鄆縣志

甘亭 在鄆縣西南五里緒漢書在甘水之東長水鄉

長安志馬融曰甘有扈氏南郊地名索隱曰夏啟所伐

鄆南有甘亭

史記夏本紀注

邠亭

公劉徙居邠今邠州東北有幽亭

春秋王朝興廢說

商

毫亭

徐廣曰京兆杜縣有毫亭

史記六國表注

有莘野

在邠陽縣東四十里夏陽村孟子謂伊尹耕

於有莘之野即此

雍勝畧

古公城

在邠州南山上與今州城相連

雍勝畧

官家洞

在三水縣東二十里中領之下即古公時之

陶復陶穴者陶復則土而陶穴則石也峭壁危崖不

可攀躋元西臺御史僧格實哩守官家洞明徐達遣兵逼之勢窮不屈與妻俱投崖下死焉

三水志

周

雨金原 周成王時咸陽雨金今咸陽有雨金原

述異記

杜郵亭 在咸陽縣西南三十八里白起自刎處

雍勝畧

杜郵亭今名孝里亭中有白起祠

水經注

幽王城

一名幽王壘在臨潼縣東南戲水上城高八

尺周二百八十步國語曰幽王滅於戲蘇林曰戲邑

名也在新豐縣東南三十里戲亭是也

長安志

烽火樓 在驪山上第一峰

雍勝畧

褒姒不好笑幽王欲

其笑舉烽火諸侯至而無寇乃大笑幽王說之為數舉烽火其後諸侯不信犬戎攻幽王徵兵莫至遂殺

幽王驪山下

史記周本紀

狗柳堡 在藍田西五十里

賈志

白鹿原上有狗柳堡秦

襄公時有天狗來下其上有賊天狗吠而護之故一

堡無懼心

辛氏三秦記

焦穫澤

獬豸匪茹整居焦穫

詩經大雅

焦穫亦名瓠口亦

名瓠中在雍州涇陽縣城北數十里

括地志

爾雅十數周

有焦穫郭璞以為池陽瓠口是也

雍勝畧

說經臺

在盩厔縣樓觀南有臺老子於此說道德經

授尹喜又曰昇天臺臺上有再生柏世傳老子說經

於此見二柏枯以針灸之復生今尚鬱茂人以為靈

異

賈志

直市城

在富平縣西南二十五里秦文公造物無二

價故以直市為名

三輔
黃圖

雨金堡 在富平縣東南三十里周八百步東有雨金

堡史記秦獻公十六年雨金櫟陽後因名堡按其地

古櫟陽界也

長安志

穆公城 在富平縣南三十里南面西面崇一丈五尺

東北面無牆

長安志

石鼓 在鳳翔縣南二十里之石鼓原

賈志

石鼓文在鳳

翔府天興縣南石形如鼓其數盈十蓋記周宣王田

獵之事即史籀之迹也貞觀中吏部侍郎蘇勗紀其事云虞褚歐陽共稱古妙雖歲久訛缺遺迹尚有可

觀

元和志

今在北京國子監

雍勝畧

授經臺

在鳳翔縣南本終南山峯尹喜既見老子授

五千言喜退而書之曰道德經後嘗居此

雍勝畧

野人塢

在鳳翔府城南秦穆公失善馬野人得而食

之者三百人吏捕得欲法之公曰吾聞食善馬肉不飲酒傷人皆賜之酒其後秦伐晉三百人皆求從報

德遂脫穆公於難

名山記

鳳臺

在鳳翔府城南十五里

賈志

雍有鳳臺秦穆公時

有簫史者善吹簫能致白鵠孔雀穆公女弄玉好之

公為作鳳臺以居之積數十年一旦隨鳳去云雍宮

世有簫管之聲焉今臺傾祠毀之不復然矣

水經注

召公亭

在岐山縣西八里召公村公采邑在此故後

人建亭

雍勝畧

雍水東逕召亭南召康公之采邑也

水經

注

周城 在岐山縣西北十五里亦曰周公邸邸內有泉

時平則流亂則竭號潤德泉

賈志

岐水之南有周城周

城者周公采邑也

水經注

磻溪釣石

即釣臺在寶雞縣東南磻溪谷中溪邊其

石下細上鉅俯臨溪中故老相傳為太公釣魚處有

兩膝所着跡按太公釣魚臺有三在河南新安城東

者一石也今去水數丈許矣在陝西者二一在咸陽

城西土屹然不崩一在寶雞磻溪谷中石也豈太公

避紂而來初釣新安繼而釣咸陽後則釣於磻溪與

其遇文王者磻溪也

馬志

雉城 秦文公時有湯伯者逢兩童子化為雙雉西飛

至陳倉其雌東飛止於此故名

潛確類書

平陽亭 在郿縣西北賈志史記秦寧公徙平陽徐廣曰

故郿之平陽亭

水經注

白起城 在郿縣東北十五里秦白起家居所築今遺

址存

雍勝畧

弦蒲

雍州其澤數曰弦蒲

禮

在隴州西四十里按晉

地志汧縣有蒲谷鄉弦中谷即此

雍勝畧

扁鵲城

在城固縣西南四十里相傳扁鵲常居此

雍勝畧

畧

白公城

在洋縣境秦白起守漢中築此城以控制蠻

獠

雍勝畧

子貢遇丈人處

在漢陰縣境

雍勝畧

子貢南遊於楚過

漢陰見一丈人方將為圃畦鑿隧而入井抱甕而出

灌攄攄然用力甚多而見功寡子貢曰有械於此一日浸百畦用力甚寡而見功多夫子不欲乎為圃者仰而視之曰奈何曰鑿木為械後重前輕絮水若抽數如沃湯其名為槲為圃者忿然作色而笑曰吾聞之吾師有機械者必有機事有機事者必有機心機心存於胷中則純白不脩純白不脩則神生不定道之所不載也吾非不知羞而不為也

莊子

蒼野聚 在商州南一百四十里左傳昭四年楚左師

軍於蒼野杜預注曰在商縣南

商州志

商密 楚鬬克屈禦寇以申息之師戍商密秦人過析
隈入而係輿人以圍商密昏而傳焉宵次血加書偽
與子儀子邊盟者商密人懼曰秦取析矣戍人反矣

乃降秦師

左傳

商密今南鄉丹水縣

杜預注

子夏讀書石室 在飛浮山禮記云退老西河之上即

此

郇陽志

索隱曰劉氏云今同州河西縣有子夏石室

學堂

史記仲尼弟子列傳注

三累山南有石室西面有兩石室

北面有兩石室皆因阿結牖連局接闌東廂石上猶傳杵臼之跡庭中亦有舊宇處北坎室上有微滑石溜豐周瓢飲似是棲遊隱學之所昔子夏教西河疑

即此也

水經注

白起社田 在澄城縣北六十里將軍山南有村曰社

田相傳為起食邑

澄城志

武城 正義曰括地志云故武城一名武平城在華州

鄭縣東十三里

史記魏世家注

武城在華州東二十一里又

名光武城乃征隗囂時所築遺跡尚存

馬志按史記注武城在

華州東十三里係古華州焉

志仍之非也今應從馬志

桃林野 春秋時晉侯使詹嘉守桃林之塞杜預曰桃

林潼關是也書著武王之事曰歸馬於華山之陽放

牛於桃林之野孔穎達引杜預語亦以桃林塞為在

關且曰華山之旁尤乏水草非長養牛馬之地欲使

自生自死以示戰時牛馬不復服乘也

雍錄

告平城 在華陰縣敷水之西

賈志

敷水南出石山之敷

谷北還告平城東舊所傳言武王伐紂告太平於此故城得闕名非所詳也

水經注

王宿莊 宜氏族譜云宜氏世居華城東北二十里地曰王宿莊古傳周太子宜臼廢出奔曾宿渭陽之濱即此暨踐阼後以封庶子賜姓宜氏

華州志

魯王宮城 在蒲城縣西南四十里大統記曰即魯哀王城也視其餘迹尚有宮城板築之象今在內政村

長安志

晉太子虛糧寨

在蒲城縣東北六十五里沮水西岸

史記晉世家曰晉穆侯四年娶齊姜氏為夫人七年

伐條生太子仇杜預曰條晉地漢地理志懷德縣禹

貢北條荆山在南按今朝邑縣西南有懷德故城即

古條近焉虛糧史傳無聞

長安志

晉城 在蒲城縣東南四十里舊傳晉公子重耳出亡

於蒲所築計公子避難何暇築此傳聞秦孟明敗後

晉建城為屯守也

蒲城志

秦

邵平瓜田 在舊長安城東門外今長安縣之西北也

雍勝畧 廣陵人邵平為秦東陵侯秦破為布衣種瓜青

門外瓜美世謂之東陵瓜

水經注

皇子陂 在萬年縣南二十五里

長安志

皇子陂在樊川

水經注

天寒皇子陂

杜甫詩

陂在啓夏門南三十里陂北

原上有秦皇子冢因以為名隋文帝改曰永安陂周

迴九里

寰宇記

蘭池陂 在咸寧縣東二十五里

雍勝畧

始皇引渭水為

長池東西二百里南北二十里築為蓬萊山刻石為

鯨魚長二百尺亦曰蘭池陂

三秦記

文學城 在興平縣東崇二丈五尺十道志曰今謂之

故縣城

長安志

武學城 在興平縣東一十里崇二丈五尺與文學城

相接二城並秦章邯築

長安志

章邯臺 在興平縣東南十里按項羽封章邯為雍王

都廢丘故有此臺焉

馬志

跌脚石 在興平縣南十里付寨村俗傳雍王章邯都

廢丘聞韓信修棧道不設備後信兵至邯失計跌脚

於此石以悔之有跡存

馬志

露臺 臨潼縣驪山東南三十里秦始皇露臺祠在焉

不齋戒往者輒風雨迷道

潛確類書

坑儒谷 在臨潼縣西南五里

長安志

師古曰今新豐縣

溫湯之處號愍儒鄉溫湯西南三里有馬谷谷之西

岸有坑古相傳以為秦坑儒處也

漢書儒林傳注

秦既焚書

苦患天下不從而諸生到者拜為郎前後七百人乃

密令種瓜於麗山坑谷中溫處瓜實成詔諸博士諸

生說人人不同乃命就視之為伏機諸生方相難不

決因發機從上填之以土皆壓終乃無聲

衛宏古文尚書序

佷石 在臨潼縣東十里秦始皇陵東南二里形似龜

初始皇遠採此石將致之驪山至此不復動石崇一

丈八尺周十八步

長安志

謝聚 在始皇陵北十餘里

關中記

鐘官城 一名灌鐘城在鄠縣東北二十五里秦始皇

收天下兵器銷為鐘鐻處

元和志

華陽 在富平縣東南三十里始皇二十三年李信伐

楚敗歸時王翦謝病家居始皇疾駕入頻陽手以上

將印佩翦身授兵六十萬後三日翦發頻陽始皇降

華陽公主簡宮中麗色百人為媵北迎翦於途詔即

遇處成婚翦行五十里遇焉列兵為城中堅設錦幄

行合禮信宿公主隨翦入都詔頻陽別開主第今

名相遇處為華陽

賈志

王侯堡 在富平縣西北四十五里即王翦屯兵之所

又莊子鎮有王翦別業

賈志

灰塹 在渭南縣西南五里崇三十尺周一百步俗傳

秦始皇焚書處

馬志

金牛道 在褒城縣境秦五丁所開漢永平中司隸楊

厥鑿而廣之

馮志

昔蜀王從卒數千餘獵於褒谷秦惠

王亦畋於山中怪而問之以金一筐遺蜀王及報欺
之以土秦王大怒其臣曰此秦得之瑞秦王未知蜀
道乃刻石牛五頭置金於尾下偽如養之者言此天
牛能屎金蜀人見而信之乃令五丁共引牛成道秦
知蜀道使張儀伐之蜀王開戰不勝而亡

十三
州志

平舒城

在華陰縣西北六里

括地
志

秦始皇使者嘗夜

過平舒道有人持壁遮使者曰為我遺鑄池君因曰

今年祖龍死忽不見

潛確
類書

平舒道中是山鬼預言祖

龍死處地蓋在華陰縣也其言遺鎬池君者指上林周武王故都言之也十道志誤認其語遂著瀉池於

華陰則失之矣

雍錄

秦長城

在蒲城東五十里秦築長城即是塹洛也

三秦

記

秦孝公九年作長城簡公二年塹洛今沙苑長城

是也

寰宇記

楊侯村

在洛川縣東南六十里即楊班故里

延安府志

赤鴈營

在洛川縣南九十里秦將軍楊班立陣之地

因赤鴈落營故名

延安府志

朔方臺 在綏德州東一里無定河東岸相傳秦太子

扶蘇築一名扶蘇臺

雍勝畧

漢

軹道亭

在漢長安城東十三里

賈志

秦王子嬰素車白

馬繫頸以組封皇帝璽符節降軹道旁

漢書高帝本紀

蘇林

曰亭名也在長安東十三里師古曰軹音枳軹道亭

在霸成觀西四里

高帝本紀注

灞上 在通化門東三十里灞河西岸漢王元年十月

沛公至灞上子嬰降文帝六年宗正劉禮為將軍次

灞上

雍大記

樊鄉

在長安城南

雍錄

樊川即杜之樊鄉也漢祖至櫟

陽以將軍樊噲灌廢邱最賜邑於此鄉也

水經注

長門亭

漢書文帝出長門若見五人於道北立五帝

壇

長安志

按亭在今咸寧縣

霸陵亭

李廣家居數歲廣家與故潁陰侯孫屏野居

藍田南山中射獵嘗夜從一騎出從人田間飲還至
霸陵亭霸陵尉醉呵止廣廣騎曰故李將軍尉曰今
將軍尚不得夜行何乃故也廣宿亭下

史記李
廣傳

朱博村 去杜祠三里朱博丞相故里也在華嚴寺下

北倚少陵下瞰終南

賈志

漢瓦 形制古妙工極精緻雖塵壤漬蝕殘缺漫漶破
之如新人有得其瓦頭者皆作古篆盤屈隱起以為
華藻其文有曰長樂未央有曰長生無極有曰漢并

天下有曰儲胥未央有曰萬壽無疆有曰永奉無疆
亦有作上林字者以是知古人製作不苟雖瓦甃必
有銘識不特彝鼎為然

長安志

曲郵 在咸陽縣境漢書高帝征黥布張良送至曲郵

長安志

蕭城 在咸陽東北四十里漢高祖長陵之北世傳蕭

何築城以守長陵故名

馬志

棘門 在咸陽縣東北十六里漢文帝後二年徐厲為

將軍次棘門孟康曰在長安北秦時宮門也

長安志

棘

門在橫門外

三輔黃圖

周氏陂

在咸陽縣東南三十里亦名周氏曲

咸陽縣志周

氏陂南一里有漢蘭池宮

李善文選注

陂周十三里漢周

亞夫有功遂賜此陂故地以氏稱之

括地志

正陽洞 在咸陽縣東四十里世傳漢鍾離修道之處

馬志

灞館

漢灞館王莽更曰長存館

長安志

按三輔黃圖王莽更灞橋為長

存橋館臨灞橋而設故名亦因之

樊噲城 在興平縣南十里崇二丈西京雜記曰漢王

襲雍王章邯敗走廢邱城命將軍樊噲圍之於城西

築臺以望今城南有武延臺疑是

長安志

小槐里 李奇曰即槐里之西城東有槐里城故以此

城為小槐里

長安志

鴻門亭 即漢高祖見項羽之處在大道北下坂口

長安

志 鴻門也者驪山之北十里而新豐之東十九里也

地有坂橫亘大道中鑿隧路以為門徑故曰鴻門其

迹尚在不知何世立此關隘也

雍錄

安幕拘

在臨潼縣東二十里

賈志

相傳漢高祖幸新豐

安營幕於此

長安志

項王營

在臨潼縣東南十五里

馬志

露臺

師古曰今新豐縣南驪山之項有露臺鄉極為

高顯猶有文帝所欲作臺之處十道志曰漢文帝罷
露臺於此然則驪山露臺正文帝已有成基而惜費

不肯竟役者也

雍錄

步昌亭 三輔黃圖曰成帝於霸陵北步昌亭起昌陵

即武帝之廢陵也

長安志 按亭在今臨潼縣

三田村 在西安府臨潼縣田真兄弟分而復合荆花

再生即此

潛確類書

昆吾亭 在藍田縣境漢宣帝霍皇后葬亭之東

長安志

射鴈臺 在藍田縣北二十里漢將軍李廣之庄也廣

屏居藍田山下出獵見草中石以為虎而射之中石

沒羽今掛弓樹尚存地名官庄

賈志

將帥堡 在藍田縣南白鹿原十里與蕢山相接前數里

即長水漢長水校尉屯兵之處

賈志

胡城 在渭南縣南十里舊說匈奴休屠王部落降漢

築此城以居因名

長安志

金氏陂 在故下邳縣東南二十里漢昭帝以金日磾

有匡輔功賜陂地數千畝雍大記云即渭南地薨賜

冢地於此後人稱其陂曰金氏陂

雍勝畧

樂視臺 在富平縣西南二十里世傳漢武帝遊樂其

上今廢

賈志

任光故里 漢河陵侯石碑立廊州南門外子孫甚蕃

住羊村

延安府志

郿塢城 在郿縣東十五里漢董卓封郿侯據此築塢

高厚皆七丈號曰萬歲城徙金銀雜物於內積三十

年穀俗謂之小長安

雍勝畧

渭水東逕郿塢南

水經注

龍門洞 在隴州西北一百五十里相傳為漢婁敬樓

處

雍勝畧

拜將壇

在南鄭縣漢高祖拜韓信為大將處故基尚

存

雍勝畧

藏劍岩

在褒城縣南二十里世傳漢高祖為王時藏

劍於此

雍勝畧

棧道

在褒斜谷中漢張良說高祖燒絕棧道即此唐

人詩梁州秦嶺西棧道與雲齊

馬志

樊噲臺

在城固縣北十三里上容百餘人漢將樊噲

築

雍勝畧

胡城

在城固縣西四十里張騫使匈奴與胡夷妻堂

邑父俱還漢中築城居之故名

雍勝畧

漢水自長柳渡

又東逕胡城南

水經注

王陵故城

正義曰括地志云王陵故城在商州上洛

縣南三十一里荊州記云昔漢高祖入秦王陵起兵

丹水以應之此城王陵所築因名也

史記高祖本紀注

劉仲城

在郿陽縣西二里昔漢高祖兄劉仲封邑於

此唐房謙詩云千載遺踪寄薜蘿沛公鄉里漢山河

長陵亦是間邱隴異日誰知與仲多

馬志

公孫莊 在邠州西南二十五里漢公孫賀故宅今謂

之孫村

賈志

藏馬谷 在華嶽東漢武帝求仙於華山下造集靈宮

存仙殿望仙門有神馬自華山出帝令置內棧馬不

久留令人尋之見在此山谷中石龕下故名藏馬谷

又名藏馬龕東北澗中石馬跡尚存

雍勝畧

東鹵城 在蒲城縣南二十里漢書宣帝微時常困於
蓮勺鹵中如淳曰蓮勺有鹽池縱廣十餘里其鄉人
名曰鹵中孟康曰蓮勺縣西北也按漢蓮勺縣在此
縣東南下邳縣界唐大德十二年東池生瑞鹽後勅
禁斷鹽不復生

雍勝
畧

祭天金人 在甘泉山下

賈志

武帝元狩二年遣驃騎將

軍霍去病擊匈奴得休屠祭天金人祠諸甘泉以為

天神主

漢書郊
祀志

龍尾墩

在淳化縣漢元封中大秦國貢花蹄牛色駁

高六尺尾環繞其身角端有肉蹄如蓮花善走多力

武帝令輦銅石起望仙宮牛跡在石上皆蓮花形陽

關外故有花牛津輦得異石長十丈高三丈立於望

仙宮名龍鏹石武帝末石自陷入地尾出於上後人

呼為龍尾墩

淳化志

涼武地

在淳化縣北五十里以漢武帝避暑處故名

淳化

志

祈仙臺 在中部縣橋陵前漢武帝勒兵至朔方還祭

黃帝於橋山時所築

雍勝錄

杏城 在中部縣西南五里相傳漢將韓胡伐杏木為

柵以抗北狄因名

元和志

後漢

黃白城 在三原縣西南十五里後漢李傕亂政天子

東遷三輔饑歉乃移保黃白城即此地也

元和志

馬融讀書臺 在藍屋縣東北二十七里按舊圖經曰

後漢馬融讀書所

長安志

伏波村

在鳳翔府扶風縣伏波將軍馬援故居

潛確類書

絳帳村

在扶風縣馬融嘗客此

潛確類書

即馬融傳經故

宅遺址尚存

雍勝畧

回中城

在隴州西北四十里即漢來歙開道處

雍勝畧

三國

駱谷道

在藍屋漢魏舊道也南通蜀漢魏少帝正始

四年曹爽伐蜀諸軍入駱谷三百餘里不得前進牛

馬驢騾以轉運死畧盡少帝甘露三年蜀將姜維出
駱谷圍長城亦此道也

元和志

三交城

在寶雞縣西十六里司馬宣王與諸葛亮相

拒所築

元和志

落星村

在岐山縣東五十里即蜀漢諸葛亮長星墜

營處

馬志

曹操城

在漢中府城北一十七里漢末操自長安西

臨漢中因築城留夏侯淵等守之

馬志

漢樂二城

蜀志建興七年諸葛武侯徙府營於南山

下原上築漢樂二城通鑑築漢城於沔陽樂城於城

固二縣屬漢中郡沔陽今興元府西縣城固今城固

縣故西樂城在西縣西南武侯所立甚險固輿地廣

記城固縣蜀改為樂城

地理通釋

陳倉故道

在沔縣東北二十五里漢諸葛亮出散關

圍陳倉曹操自陳倉出散關即此

雍勝畧

八陣圖

在沔縣南定軍山下漢諸葛亮所作又有督

軍壇鄉人言每陰雨時聞有擊鼓聲

馬志

石馬城

在沔縣東二十里諸葛亮屯兵處

雍勝畧

伎陵城

在沔陽縣西五十里即木蘭寨蜀收孟達之

所

雍勝畧

晉

星落石

在興平縣內晉穆帝時有星隕縣西南汙澤

化為石色黃白形如甕高五尺唐韓琬為興平令移

置縣齋

賈志

淨土樹 在高陵縣南八里俗傳西域鳩摩羅什憇此

覆其履土遂生茲樹二月開如楊花八月結實狀如

小栗殼中皆黃土

名山記

赫連臺 在涇陽縣西三十里

賈志

赫連勃勃駐兵所在

今橋底鎮東有遺址

賈志

甘泉城 在渭南縣北九十里俗傳赫連勃勃所築

馬志

魏王樓 姚萇兄姚襄所建今故址存四望俱石山奇

峭如屏幃然樓南有襄教軍塲考晉書襄招集北地

戎夏歸附者五萬餘戶是時北地正徙泥陽後襄與
苻堅戰死三原襄僭號追謚襄為魏武王至今稱魏
王樓云三木門與天桃諸堡及九龍寨皆魏王故跡
九龍寨尚有寨門地牢故址相傳魏王立屯三百六
十日宴一屯給人馬食歲一週此其一也

耀州志

天活堡 在耀州水門西北十里四面皆石崖峻絕上
有薪水可守蓋魏王姚襄所營金陝西行省李興嘗
避兵於此今其瓦礫堆積遊者往往得遺鏃折戟雨

後或拾銅錢金鍤古鏡諸物

賈志

偽夏太后城 在洛川縣西三十六里赫連勃勃聞劉

裕滅姚泓命子義真等守長安大悅自將兵入長安

留太后於此築城以居

元和志
交在今鄜州治按洛

吳兒城 在龍泉縣西北四十里初赫連勃勃破劉裕

子義真於長安遂虜其人築此城以居之號吳兒城

元和志
按龍泉故縣
在今綏德州東三里

宋

思鄉城

在藍田縣東南三十三里宋武帝征關中築

城於此南人思鄉因以為名

元和志

思鄉城一名柳城

以城旁多柳故曰柳城

長安志

魏

逍遙觀

孝文帝嘗登此觀望逍遙園見嵯峨山慨然

語左右曰望見此山令人有脫塵之意

長安志

永安故城

在三原縣西北六十里杜寨北今考杜寨

北小杜村西北有故城城邊有唐貞元間碑載此地

遺事今此地屬淳化其碑嘉靖間為淳化磨作儒學
碑矣此地乃作鎮處杜寨則義柵所也亦名鴻賓柵
按地圖記後魏孝明帝孝昌三年蕭寶夤亂闕右毛
遐鴻賓立義柵扞賊孝莊帝永安元年於此置北永
州以鴻賓為刺史俗謂之鴻賓柵孝武帝永熙元年
徙北雍州於宜州仍於此柵置永安鎮此其故城也

馬志

董龍社樹

在盤屋縣西南三十里舊圖經曰董龍蓋

屋人家貧村社衆人祭社逐出之龍遂以泥造飯祭
之後穿地得黃金因大富遂名董龍樹

長安志

後周

中華郡城 在富平縣西南三里石川河之陽後周閔

帝置有二石人卓立即郡門所在人稱為石婆婆原

賈志

隋

豐潤陂 在咸寧縣東北二十五里周六里後周太祖

名為中都陂隋文帝改今名

寰宇記

滋水驛

在咸寧縣東北三十里今廢

馬志

隋開皇十六

年置

兩京道里記

在長樂驛之東睿皇在藩日經此廳之

西壁畫一胡頭因題曰喚出眼何用苦深藏縮却鼻

何畏不聞香

南部新書

定官石

隋唐間隕於鄠縣人家園中化為巨石移府

城九街唐時舉人就試以鐵釘釘之驗其中否復置

藩署以卜官曰官清者大者釘之入否則弗入因號

定官

鄠縣志

宜壽城

在盤屋縣南三十里即隋之宜壽宮城也

馬志

隋文帝莊

相傳在避暑宮以西漫無可考惟金大定

二十七年重修岱嶽廟記云古蹟則有隋文帝魏元成

之舊莊今則失其處矣

澄城志

看花臺

在同州城南相傳隋煬帝築之雒岸者下有

蓮池上起馳道今其址尚存

同州志

隋牛弘故居

在邠州西南六十里宜祿舊縣東進賢

里隋吏部尚書牛弘故居也俗呼相莊牛弘詩簷前

無數好峰巒醉眼詩腸冰雪寒不換宜山真面目請

君來此倚欄杆

邠州志

唐

洛女陂 在咸寧縣東十五里

寰宇記

洛女冢南有洛陂

俗號洛女陂

三輔舊事

乾湫 在神禾原皇甫村東舊傳有龍移去南山炭谷

原湫水遂涸故名乾湫

城南注

長樂驛 在咸寧縣東十五里今廢

馬志

郭子儀乾元元

年破賊河上遂朝京師詔百官迎於長樂驛帝御望

春樓待之

天中記

韓莊 即韓退之城南雜題又送符城南讀書之地也

莊在韋曲東皇子陂南引南陂水為南塘後為里人

楊氏所有穿洞起閣引泉落地孟郊張籍俱有遊韓

莊詩

馬志

鄭莊 即鄭虔郊居在韓莊東南李商隱有過鄭虔舊

隱詩

馬志

范氏莊 本唐杜佑郊居門人權得輿為之記唐舊史

稱杜佑城南有樊川亭有桂林亭卉木幽邃日與公
卿宴集其間元和七年佑以太保致仕居於此焉式
方傳又云甲第在長安里杜城有別墅亭館林池為
城南之最范公熙寧中自侍御史出買此莊於尚書
郎胡拱辰胡之前猶為杜氏有之自杜至范三易主
矣今猶謂之御史莊有溪榭嵩軒江間圃堂林館謂
之范公五居

馬志

員莊 員半千莊在焦戴川北枕白鹿原蓮塘竹徑醅
釀架海棠洞會景堂花塢藥畦碾磨麻稻里諺曰上

有天堂下有員莊

長安志

金鑾坡 龍首山之支隴隱起平地而陂陀靡迤者也
其上有殿改名為金鑾殿故殿之旁坡亦遂名曰金

鑾坡

雍錄

愔別里 吐蕃請婚中宗以所養雍王守禮女為金城
公主妻之帝為幸始平縣設殿帳於百頃泊側餞別

因改始平縣為金城縣又改其地為鳳池鄉愴別里

舊唐書

吐蕃傳

靈符觀 天寶初桃林獲寶符將入城宿於此因置觀

在長樂陂南

兩京道里記 按長安志觀在咸寧縣

渭城 咸陽縣之東境也唐世多事西域故行役者以

出陽關為言既渡渭以及渭城則趨玉門陽關者皆

由此始故王維詩隨地紀別而曰渭城陽關其實用

霸橋折柳故事也

錄

馬嵬故城 在興平縣西北二十三里雍都西九十里

城本是馬嵬築以避難馬嵬者姓名也有驛楊妃死

於驛白居易詩曰西出都城百餘里雍錄貴妃粉出馬

嵬坡上土白如粉塊婦女面有黑點者以粉洗之即

除

西安府志

李靖營 在臨潼縣東二十里

馬志

鹿臺縣 在高陵縣南二十五里有果園名鹿苑唐析

置鹿苑縣有鹿臺祠在鹿苑原上百姓祈禱水旱有

驗鹿臺將軍元末李思齊築城戍此

賈志

巢閣

在鄠縣西七里白樂天讀書處村名割耳莊有

白沙諸泉長安逸士張光裕滙泉為湖種竹十畝倚

樹為樓高七丈故曰巢閣馮恭定講學其上富平劉

斛元士龍有記紀其勝

賈志

石門精舍

在藍田山石門寺王摩詰嘗遊於此

西安府志

咽瓠泉

在藍田縣西北一十五里

長安志

李筌得陰符

經讀數千遍不曉其義入秦至驪山下逢一老母與

說陰符之義袖中出一匏令筌谷中取水瓠忽沉及

還已失所在

投經
碑記

青泥城

在藍田縣南七里按嶢柳城亦謂之青泥城

即今縣是也舊有青泥坊杜甫詩飯煮青泥坊底芹

西安
府志

五郡城

在盤屋東三十里與古樓觀相近舊說兄弟

五人共居此城因以為名後為道觀有唐明皇碑

馬志

義亭城

唐開元間徙富平於義亭城即今舊縣地蓋

古之鄉亭也里曰義里在富平縣東北十里

賈志

魏徵故里

在富平縣境宗支碑石尚可誦讀有左右

鵝鴨池

賈志

半日村

在渭南東五里新豐原寰宇記此村以山高

蔽尉陽光僅及其半唐郎士元為渭南尉置別業於

此村

賈志

白樂天故里

在唐下邳縣東紫蘭村有異花亭今考

樂天渭村題詠最多

賈志

杜甫川 在延安府城南七里西南折入四十里牡丹

遍山谷樵者採之為薪歐陽永叔花譜所謂延安牡丹與荊棘無異者也甫避亂寓此范仲淹大書杜甫

川三字於川口

延安府志

賣酒樓 在鳳翔府寶雞縣陳倉城內自唐至宋屢更

兵火獨此樓存

潛確類書

端正樹 上發馬嵬行至扶風道道旁有花寺畔見石

楠樹團圞愛玩之因呼為端正樹

太真外傳

臨汧城 王承元為鳳翔節度使於汧陽西北八十里

築新城一所賜額為臨汧城鳳翔西接涇原無山谷之險吐蕃由是往往入寇故承元奏於衝要築壘分兵千人以守之又鳳翔府城東商旅所集居人多以烽火相驚承元益城以環之

冊府元龜

隴亭 在隴州隴山官道傍唐時已有此亭童謠曰秦

隴無人塞草腥將軍一去泣空營漢家天子東巡狩

行到江南又起兵

雍勝畧

褒城驛 元微之為御史奉使東川飲於褒城驛寶明

府廳虞鄉黃丞犯令逃去再使東川至褒城驛黃丞
餽酒艤舟微之與同酌徧問褒陽山水則褒似所奔
之城在其左諸葛所征之路在其右感今懷古作詩
贈黃曰昔年曾痛飲黃令困飛觥席上當時走馬前
今日迎迤邐七盤路坡陀數丈城花疑褒女笑棧息

武侯征一種埋幽石空聞千載名

本事詩

仙人洞 在商州西百一十里深五六丈石紋斑駁壁

彩陸離以蓮花石有滴水垂珠禱雨者以瓶盛之得

一二點即雨俗傳為湘子洞官道北有湘子洞碑

商州

志

乾坑 在同州西四十里唐李元諒敗李懷光於乾坑

李克用自河中屯乾坑敗黃揆於沙苑今名界溝以

州西界也

同州志

白樓 同州有白樓唐賢眺詠之所令狐楚作賦刻其

上

集古錄

烟入白樓沙苑暮

白樂天詩

同家窪

少留同家窪

杜甫詩

即同州同谷窪

葉夢弼注

三曲城

在同州界地志三業城即此

馬志

鄭魏公莊

同州北境良輔鎮即唐鄭魏公莊也

畫漫錄

遊春亭

在鄭縣故城東北三里土人呼曰杜基蓋杜

甫謫華州司功嘗題詩其亭故也又東二里曰西谿

其地絕勝人慕杜司功之風遂名之為小曲江

雅勝畧

鄭縣亭子

郡志載鄭縣亭子在西溪為今杜基者是

按杜詩曰鄭縣亭子澗之濱戶牖憑高發興新味憑

高二字則非西溪可知也又曰雲斷嶽連臨大路天
晴宮柳暗長春杜詩注夢弼曰陝華間有地名大路
晉書檀道濟伐姚泓至潼關姚鸞屯大路以絕道濟
糧道是也長春謂長春宮在同州朝邑縣去鄭縣亭
子才一舍由此以論則鄭縣亭子當在華東渭濱之
間又非西溪可知也西溪曰杜基後人慕公而祠之
鄭縣亭子即晉時高平亭必非西溪之杜基矣又按
儲光義過華陰詩有曰朝行敷水上暮出華山亭高

館宿初靜長亭秋轉空又按陝西通志有敷西城在華陰縣敷水之西郭延生述征記以為苻姚所置即其地也雍錄與明一統志未及詳考郡志仍之得無

未按地理乎

華州志

令狐莊 在耀州西北窰洞飾以丹青人傳為令狐綯山居明嘉靖三十四年地震洞始圯父老言寺溝村有令狐氏祠堂七王廟側有蓮池俱無跡

賈志

太元洞

在華原東五里

賈志

唐孫真人思邈隱居所也

往時遊者持火可深入今崩礙不能行洞下有洗藥

池二皆鑿石為者

耀州志

高塢城

在鶉觚北五里唐太宗圍薛仁果於此

雍勝畧

奉天故城

唐德宗建中元年術士桑道茂言陛下不

出數年暫有離宮之厄臣望奉天有天子氣宜高大

其城池以備非常乃命京兆發丁夫數千推六軍之

士築奉天城詔州鎮無得修城毀其守具

潛確類書

奉天

城外象龜形內列六街

名山記

舊子城周五里羅城周

十里後子城埧塼今乾州城即羅城舊址

乾州志

薛仁貴采地

在乾州東四十里至今名薛祿鎮

乾州志

雙烈村

在乾州北門外唐竇氏雙烈女故居也即今

竇村北門內有雙烈坊即為二烈女建

乾州志

相思鋪

鄜州東百里有水名相思河傳舍曰相思鋪

令狐楚詩曰誰把相思號此河塞垣車馬往來多只

應自古征人淚灑向空川作碧波

詩話
龜鑑

馬蹄石

在葭州西南二里舊城其石有馬蹄痕世傳

秦王下馬跡

雍勝畧

駱駝巷

在鄜州城西北三十里杜甫遊梅柯嶺往來

止宿於此

延安府志

宋

長樂亭

在通化門外十里長樂坡宋陳堯咨守京兆

時作每有迎餞必至斯亭嘗作歌刻石亭中

馬志

桂林亭

亦曰三桂亭新說曰亭在長安城南潏水之

陽宋諫議陳公別墅三子堯叟堯佐堯咨同登科扁

其亭曰三桂堯咨知永興軍時題詩於碑有句云扶

疎已問新栽竹清淺猶尋舊漱泉

馬志

玉峰軒 在興教寺北松檜半原地形高爽南對玉案

峰宋元豐中龍圖呂公祈禱太湫道經是寺登此崗

南瞰玉案令僧創是軒為登眺之所權長安令陳正

舉為之記

馬志

雷簡夫隱居處 自石炭谷口穿雲渡水躡亂石冒懸

崖行十餘里數峯聳削蹬道之半有司馬溫公隸書

二十八字曰登山有道徐行則不困擇平穩之地而置足則不跌人莫不知之鮮能慎谷前太乙觀有希夷先生所撰碑觀南為故處士雷簡夫隱居之地

遊城

南記

四馬務 在興平縣東南二十里一曰飛龍務次大馬務次小馬務次羊澤務地凡三百七十一頃南渡渭河慶厯中為營田尋罷之其後民占佃簿籍散亡不

復歸於有司

長安志

喜雨亭 在鳳翔府東北蘇軾判郡時建鑿池其南引

流種樹為休息之所自為文記之

馮志

井田 在郿縣東五十里橫渠鎮南宋張載所畫未就

之井田也

馮志

天漢樓 在漢中府治東北子城上宋建王沖詩仰窺

日月三千界平見江山七十州

馮志

玉泉院洞 華山玉泉院洞有希夷先生睡像黃衣束

緜儼乎如生塑於先生存時元至正間宣撫王守誠

嘗摹刻於石今樹洞中院東巨石如削刻宋陳古靈

詩

都翳將
華山記

李公窰

在清澗縣東北百步相傳李顯忠母避雨窰

內適生顯忠紅光滿地後有棲者輒生疾不敢復居

延安

府志

种公井

即石井

延安府志

种君世衡任鄜州從事建言延

安東北有故寬州請興之然處險無泉議不可守鑿

地百五十尺始至石工徒拱手曰是不可井矣君曰

過石而下將無泉耶攻其石屑而出之凡一畚償爾
百金工復致力過石數重泉果沛發萬人歡呼曰神
乎雖甲兵重圍無困渴之患矣復作數井兵民馬牛
皆大足自茲西陲保障患無泉者悉倣此

范文正公集

塵玉亭 在鄜州唐羅虬為鄜坊從事賦比紅兒百首

末曰花落塵中玉墮泥香魂應上窈娘堤欲知此恨
無窮極長倩城烏夜夜啼宋康識守鄜日因建亭取

塵玉二字為名

馮志

元

清風臺 在寶雞縣東南六十里元真人邱處機所築

西倚飛雲之壁東臨漱玉之溪北跨渭濱南依山色

中引清風故名呂韋有記

馬志

張三丰遺詩處 在中部縣軒轅廟側玉皇廟東壁上

碑記元至正庚子三丰手題舊志載明永樂間三丰

至廟索道士張清買瓜歸則題詩壁上去矣

延安府志

陝西通志卷七十三